

先撰志始卷下

文秉孫符著

天啟五年起崇禎二年止

正月改書院祀遼東死難御史張銓及文武諸臣科臣李魯生以為假道學不如真節義上嘉納之故有此舉而東林之禍從此熾矣

南樂魏廣徵所薦正人內有王之臣者獨加四圈乙丑大計南京吏科給事中楊朝棟循例糾拾逆賢力為挽救遠傳旨王之臣頗嫻將略方需顯擢且臺疏不列豈為公論仍俟邊撫負缺補用

御史劉弘光疏稱賜環諸臣遭門戶毒手如科臣陳胤叢霍維華道臣潘汝禎王雅量皆飽靡風霜才堪大任

孫杰陞而維華獨後何以稱持平也有旨嘉納維華出
即恭示詩教持軸者為詩教推轂以維華居言路為碍
急除維華為常僕後頗覺之遂成仇隙互相傾陷
御史劉弘光又疏參談自省等薦邵輔忠姚宗文劉廷
元施樞有旨談自省等俱削奪邵輔忠等速催上任
給事中霍維華疏論梃擊紅丸移宮三案媿一數千言
奉行這本條議一字不差韓墻等俱削奪范濟世王志
道江慶伯劉廷元徐景濂郭如楚張捷分別用唐嗣美
岳駿聲曾道唯即占推用李可灼免戍着回籍閑住
涿州馮銓始入南樂魏廣微幕下廣微極相推引銓復
結歡魏良卿傅應星等為之延譽又逆賢未閹時有妻

馮氏亦涿州人疑與銓同宗頗有故劍之思甚注意焉
因令王體乾侍上時為舉甘羅故事銓又令御史張樞
疏催請枚卜內有司馬耆英潞公矍鑠壽考可无遺也
亦有少年學士黑頭相公則英妙未可少也等語廣微
聞其事忌之具揭逆賢阻其枚卜馮銓入相後頗聞其
譖遂與崔呈秀等暗毀廣微適廣微有救楊左之揭逆
賢大怒幾蹈不測云

御史梁夢環疏論計典遂叅汪文言有旨汪文言着錦
衣衛差的當官旗扭解來京究問初傅魁叅汪文言已
逮問受杖矣至是逆賢恨楊左甚馮銓與霍維華楊維
垣李魯生等密謀說逆賢與大獄借汪文言口以殺楊

左特令夢環出此疏從此緹騎遍地矣

汪大言逮到奉旨拿送鎮撫司好生打着問時北鎮撫
司許顯純打問過汪文言招出甘肅巡撫李若星用銀
五千兩謀得此缺奉旨李若星削奪一切贓私着嚴行
究問務要指出何人收受確招具奏該司究問汪文言
供招具題奉旨楊鎬熊廷弼既失封疆又用賄買楊漣
等希圖倖脫楊漣左光斗周朝瑞魏大中袁化中顧大
章俱着錦衣衛差的當官旗扭解來京究問趙南星等
俱削奪為民仍令該撫按提問追贓具奏

楊左之逮也初借移宮為按而苦于無贓徐大化倡為
封疆之說蓋移宮屬楊左與顧大章等無與封疆止周

朝瑞保薦熊廷弼而顧大章與楊維垣屢疏爭辨耳與
楊左袁魏又無涉惟合移宮封疆為一局以殺六君子
報忠賢二十四罪之恨修廣微糾論失儀之怨者徐大
化也而賈繼春又獻串通王安之說俾殺楊左有名諸
人所以為忠賢計者誠不遺餘力矣

楊左等既先後逮到下北司拷問六公各辨論不屈魏
公曰若如此不是明心堂是昧心堂矣蓋北司堂名明
心也許顯純奉忠賢意旨鍛鍊愈酷左公謂北司所能
難我者供招不具也供招具自應下法司擬罪庶有見
天之日而徒駢死獄底無益乃具承招上該司請送
刑部擬罪追贓不允仍着北司嚴限五日一比諸君子

應亦自悔焉周公謂忠賢所恨惟楊左耳楊左死四人
猶或可生反速祈二公之死而究竟俱不能免各坐贓
數萬俱拷掠無完膚每一公死顯純即剔喉骨用小盒
封固送逆賢示信五公既死將頌大章送刑部擬罪
定仍還鎮撫追比顧公語家人曰此福堂也不死何待
遂自盡刑部獄中

大獄既興凡人殺人媚人者無所不至漳浦知縣楚烟
追比肆毒于周起元子彥升江夏知縣王爾玉索賄逼
死熊廷弼子兆珪黃州推官王萬金于梅公之煥之獄
嚴練周密不遺餘地萬金本房師王公洽馳書囑其護
持且曰我輩識力正于此認取梅公正直願恢千古隻

眼為萬代瞻仰萬金幾欲發王書以求媚噫以師生而
忍為此則小人奸險良心一失何所不至哉至若應山
知縣夏之彥立簿募金以助楊公桐城知縣陳贊化竭
力護持左公家屬為上官呵譴挺立不顧武昌推官鄧
來鸞委曲周旋熊廷弼家常州知府曾櫻力庇高公家
免其子提問于江陰李應昇年誼尤篤代出索金以饋
經騎撫視患難不遺餘力皆一時之卓然者是可頌也
是可法也

大學士魏廣微揭奏今日文書房傳旨鎮撫司打問過
楊漣等贓着臣等票擬逐日嚴行追比五日一回奏完
日送法司擬罪不勝驚愕臣自辦事閣中茲未見有此

旨念楊漣等在今日雖為有罪之人在前日寔為聖明之佐即贓私事真轉發刑部臣猶議減免之條若逐日嚴刑就死直湏臾耳揭入降諭切責畧曰朕自去歲屏逐兇邪廓清朝宇勵精圖治雅意中興秉軸大臣莫有為朕分憂共念者楊漣左光斗移宮一案背先帝之深恩陷朕躬于不孝熊廷弼喪遼辱國寸斬尚有餘辜而楊漣左光斗等受其重賄巧為出脫此皆天地不容人神共憤而在朝文武持祿養交徇私避禍但顧子孫之計不圖社稷之安朕方率循舊章而曰朝政日亂朕方祖述堯舜而曰大不相侔以致言官承望風旨緘口結舌無敢直明其罪者今宜改過自新共維國是敢有陰

懷觀望時弄機關或巧借題目代人報復或捏寫飛言希圖翻案者朕按祖宗紅牌之律治以說謊欺君之罪必不食言其楊漣等生為貪婪之賊臣死為不忠之逆鬼今雖在獄身故而殘害忠良惡類尚存俟追贓完日明具爰書暴其罪狀布告遠迩昭普史冊垂示將來以為萬世人臣不忠之戒

楊漣等下獄廣微心不自安而力不能得之于逆賢家臣崔景榮有書勸其申救廣微因此出揭隨有此諭蓋忠賢惡之也內朝政日亂大不相侔引廣微揭中語也而擬此諭者馮銓也馮銓又令御史門克新以參廣微誤聽崔景榮識見潛移脚跟不穩并叅崔

景崇倡調停之說以媚逆邪廣微大懼出崔書為徵
挾顧秉謙以求援逆賢怒稍解廣微引疾回籍景崇
削奪

御史卓邁疏恭熊廷弼急宜斬因薦蘇琰余合中林一
桂三人有旨蘇琰等俱着原官起用

八月上諭內閣我皇祖特起熊廷弼于田間授以經略
賜之上方賜之蟒玉寵極人臣義當盡瘁乃廷弼欺朕
即位托病卸担薦表應泰而遼東亡既則劉復不仁望
風先遁而河西失當是之時不知費國家幾百萬金錢
喪軍民幾百萬性命徵兵西蜀則西蜀變風聞山東則
山東亂至今黔中尚岌岌未寧斯其罪難以擢髮數追

三尺莫逃百計鑽求其寀甚者則有周朝瑞十日四疏
申救有顧大章妄謂罪屬可矜而又托奸徒汪文言內
探消息外入楊漣左光斗之幕囑令遺書求解諸奸受
賄動以萬千安問祖宗疆土法度哉朕深痛恨已將楊
漣等置之于法頃于二十一日文華殿日誦畢卿等五
員面獻刊行有像遼東傳一冊出諸袖中合詞奏曰此
熊廷弼所以掩飾誇功希圖脫罪朕親覽之鑿髮切齒
沈屢經言官郭興治門克新石三畏周洪謨等形于章
奏宜亟加西觀之誅庶大快萬民之憤卿等可即傳示
刑部等衙門着便會官決了以為人臣辱國偷生罔上
不忠之戒

遼雖之獲馮銓父子鼠竄南奔書坊中有刊賣遼東
傳者內列馮布政父子奔逃一田銓以為大辱先令
卓邁上廷弼急宜斬之疏遂于誨廷袖出此傳面奏
請旨正法閣中擬諭以進王體乾等曰此明係小馮
欲殺熊家耳與皇爺何與奏請御筆增入御等面奏
遼傳云、先是忠賢語閣臣曰廷弼即議處決閣臣
尚度日中不決黃立極曰此不過夜半片紙即可了
當矣從之廷弼奉旨從容更衣以出腦前盛一小袋
內其辨冤疏提牢主事張時雍問曰袋中何物熊曰
辨冤疏也張曰君未讀李斯傳乎囚安得上書熊曰
君未讀李斯傳耳此趙高語也以疏稿授張受刑後

傳首九邊疏卒不果上嗟乎撫當敵而經守關此熹
廟旨也廣寧之棄非熊也遼陽之陷非熊也楊鐫王
化貞安坐福堂而獨殺一弼則弼之死非死乎法而
死于局、之為言何以瞑橐街之目哉

御史賈總春疏稱王安以修隙之故倡為移宮之說楊
漣左光斗希寵助虐昧心說謊逼辱康妃虧損聖德傳
慝叅汪允言左光斗魏大中漣在其中矣于是先發遮
飾之計而叅內之疏出叅內者其所借之題目也掩不
過為自掩計耳在今日則不可不明其所以當死之罪
以破其借題之奸聞若輩後前倡惑之說久播中外而
且撰為傳記淆亂聽聞不可不禁也將聖孝明而國是

定刑章立而借題破庶是非真偽之根朗然而主聖臣忠之寔炯若臣血愴無恨矣奉旨楊漣左光斗妄希定策串同王安倡為移宮之事又與魏大中周朝瑞袁化中深盟同結招權納賄黨護熊廷弼夥壞封疆鍊案既定猶貪其重賄托汪文言內探消息暗弄機關及文言事發乃巧借題目以掩其罪徇口袞誣毫無影響朕深切痛恨已將熊廷弼處決傳首九邊其楊漣等雖追贓身故顧大章限十日同結爰書既成就依這本上說將諸奸罪狀及守正諸臣向日疏揭并近日諭旨着史臣纂集成書頒行天下以正紀綱

總春之救選侍是也然却是第一截後卸過范濟世

疏未上而揭發抄矣眾正收之及至張慎言薦刻是第二截此疏以楊漣叅內為借題幾刊黨碑是第三截末疏又以楊漣叅內為正題是第四截此旨所云毫無影響者正從借題二字起也裕妃首奉宸卹成妃邀恩復封趙選侍沈冤莫愬是有影響否他可知矣刑章明而借題破殺漣者誰乎總春擊忠直可謂漢鋒開奸逆允稱護法前美不足稱後美不足贖矣御史余合中疏薦周汝璣等內云臣入都門伏讀聖諭之詞褒嘉宸衷之所眷注有潔已急公者以保護于內有矢心端慎者以輔弼于外奉旨嚴臣魏忠賢潔已奉公忠心調護朕所素鑒周汝璣等著優擢此為頌璫之

始嗣後羣相附和諂諛之態廉恥蕩然矣

吏部題陳子壯誥救撰文奉旨陳子壯并父陳熙昌依
傍門戶豈可並列要津且試錄內有庸主失權英主攬
權等語頗屬謗訕都着削籍為民當差仍追奪誥救撰
文時逆賢欲以都垣與元詩教故逐其父及其子云

工部主事曹欽程疏叅周宗建張慎言黃尊素李應昇
薦傅魁陳九疇李魯生張訥李蕃周昌晉李恒茂梁夢
環張惟一并理安伸之案有旨周宗建等削奪安伸以
原官起用

巡城御史倪文煥責治門軍為提督太監金良輔所叅
有旨切責仍着回話書吏長班等俱逮問文煥懼投崔

呈秀門下父事之言于逆賢以為孫事乃解回奏疏上
有旨念係新進姑不究文煥既投誠逆賢即疏叅李邦
華李日宣林枝喬周順昌內云周順昌給假南歸坐三
大船資貨充盈沈壓其舟狼籍河干白鏹暴露通人至
今掩口有旨李邦華李日宣等着俱削奪

周公順昌苦節為天下家南歸之日行李一肩都門
歎為希有且從琢州陸路今云白鏹三船通人掩口
真載鬼一車矣時諸君子彈射殆盡而不皆書者邪
正不兩立薰蕕不同器必然之理也因彈射而被逮
遺戍則書者清流之禍千古同痛也薦擢必書者寔
其為逆賢之私人也舉劾並列備書者因彼以及此

也倪文煥盧承欽兩疏獨書者一則指夷為跡亘古
之奇誣一則臚列黨與要典之開先也諸奸章奏大
都類此

文煥又疏叅崔景崇因云同一君子也首攻淮撫之部
輔忠力詆東林之劉廷元疏叅張鳳翔之盧謙何以久
未登啓事也同一小人也黨護淮撫之孫居相賣身東
林之史記事計陷毛文龍之夏之令何以久不聞削奪
也又東林之人輦金數十萬託李孔度為奸細陰謀翻
局豈可不問有旨崔景崇為民李孔度等削奪夏之令
逮問遂死于獄

御史吳裕中疏叅內閣丁紹軾裕中廷弼姻也廷弼之
死人言出貴池意馮銓使田景新嗾吳曰內意薄丁矣
可急叅之又傳意于逆賢曰吳必為熊報仇吳疏上逆
賢矯旨予杖以死吳之死亦馮銓所致也

御史田景新疏叅內閣朱廷禧廷禧山東人周朝瑞袁
化中亦山東人其逮也廷禧語緹騎曰好照管之事終
明白耳璫黨聞而惡之又內傳閣票欲稱逆賢為元臣
廷禧不可景新遂出疏叅之廷禧引疾有旨着回籍調
理

御史田景新又疏陳五款內一款云崔呈秀拮据大工
以待郎無御史不便乞加僉都御史用資彈壓後之
御史張訥疏叅趙南星十罪并及王允成鄒維璉程國

祥夏嘉遇有旨允成等俱削籍趙南星所引私人着指名回話張訥復疏臚列姓名指陳賄狀有旨許念敬解京究問丁元荐等為民

鎮撫司打問許念敬招出盛世承傅泚訓賄營情節有旨世承泚訓削籍許念敬法司擬罪其過付趙南星臚撫按嚴追充餉

保定撫按郭尚友馬逢臯問明趙南星一案追贓完日遣戍南星年老收贖有旨趙南星不准收贖依律戍遣南星在冢宰日郭尚友營求巡撫南星鄙其人力拒不許璫黨即推尚友巡撫保定窮治其獄尚友所以待高邑者無復人理嚴限比贓公子皆銀鐺受杖宅鬻無歸

移住家廟夫人即日憤死高邑次年死戍所時羣小立意折辱諸君子程公正己以掌察開罪下撫按追贓獄上有旨程正己着親身擺站不准收贖又刑部覆李若星着撫按官重責一百板發遣撫按郭增光鮑奇謨咸奉行惟謹

御史張訥又疏請毀書院略曰都城書院改忠臣祠矣此外又有四處孫慎行馮從吾余懋衡三大目為主盟東林書院乃李三才科民膏血所建孫慎行高攀龍竈穴其中關中書院馮從吾占據徽州書院余懋衡主管鄭三俊畢懋良拾級而登皆于此得力江右書院鄒元標既潦倒劉一憬復悞國黨亦稍散諸臣居鄉種

不法而禮卿尤借題誣蔑先帝若王之案史記事以發
牌馳驛俱乞聖斷立裁有旨一切書院俱着拆毀鄒元
標等削奪

給事中葉有聲疏薦阮大鍼余大成有旨阮大鍼陞京
堂用余大成原官起用

御史智挺疏叅解學龍等因論葉向高閻鳴泰回籍聽
勘之非有旨解學龍等俱削奪閻鳴泰着擢用時薊撫
申用懋引疾回籍部推吳中偉已領敕辭朝矣閻鳴泰
從旁徑攘取之無程赴任吳改別衙門用

吏部等衙門公疏請慎選中使奉旨既稱永樂宣德間
差內使頗多明是祖制朕念封疆恢復無期故特遣內

臣查核兵餉原諭並無掣肘卿等大臣當思仰體着遵
行前旨票內闈出鎮各邊及此旨者崑山顧秉謙也貴
池丁紹軾特揭諫止力言不便者也不聽

此內闈奉差關防篆文曰某處內官關防惟東廠則
曰欽差提督東廠官校辦事太監關防其敕諭字為
嚴重蓋永樂十八年所定也熹廟即位避御諱改鑄
官校曰官旗內闈紛出鎮崑山獻媚票注太監二
字遂以為例先朝內闈上疏稱萬歲爺稱奴婢逆
贖時遂廢此禮曰臣曰皇上曰陛下直與外廷等矣
御史盧承欽疏叅曹珍董應舉李遇知因歷舉東林自
顧憲成李三才趙南星而外如王圖高攀龍等謂之副

師曹于汴湯兆京史記事魏大中表化中等謂之前鋒
李樸賀煨沈正宗丁元薦謂之敢死軍人孫丕揚鄒元
標謂之土木魔神宜將一切黨人不論曾否處分俱將
姓名罪狀刊刻成書榜示天下人皆謂此疏何異元祐
黨碑于是大典之議興矣上諭內閣朕惟君臣父子人
道之大綱慈孝忠敬古今之通義惟我皇祖神宗早建
元良式端國本父慈子孝原無間然而奸人王之寀翟
鳳洲何士晉魏光緒魏大中張鵬雲等乃借梃擊以邀
首功皇考光宗一月御天千秋稱聖因哀得疾純孝弥
彰而奸人孫慎行張問達薛文周張慎言周希令沈維
炳等乃借紅丸以快私憾迨皇考賓天朕躬續緒父子

承繼正統相傳而奸人楊漣左光斗惠世揚表化中周
朝瑞周嘉謨高攀龍等又借移宮以貪定策之勲而希
非望之福將憑几之遺言委諸草莽以待封之宮眷視
若寇讐臣子之誼謂何敬忠之義安在幸天牖朕衷仰
承先志康妃皇妹恩禮有加而守正之臣凡因三案被
誣者皆次第賜環布列在位特允部院科臣之請將節
次明旨諸臣正論命史官編緝成書頒行天下即于新
春開館纂修特命輔臣碩秉謙丁紹軾黃立極馮銓為
樞裁官施鳳來孟紹虞楊景辰姜逢元曾楚御為副樞
裁官徐紹吉謝啓光余煌朱繼祚張紳華琪芳吳孔嘉
吳士元楊世芳為纂修官凡係公論一切訂存其羣黨

邪說亦量行摘錄後加史官斷案以昭是非之實務在
早完功成之日名曰三朝要典以仰慰皇祖皇考在天
之靈用昭云云

嗟乎自此諭出則正史去籍而偽史行矣內列諸君
子三大罪案則梃擊紅丸移宮是也試平心論之
張差梃擊擅登殿簷毆擊近侍真千古奇變巡城御
史劉廷元回奏原云稽其貌的是黠猾提牢主事王
之宋回事關青宮稍致詰問即曰奸人曰邀首功此
何說乎後此匿名榜出指斥逆賢即嚴旨緝捕內云
如有的據先將正身拏住細細研審必要窮究到底
根鞠造謀主使之人豈事涉逆賢即應窮究到底事

涉青宮祇應抹煞了事乎 唐方士柳泌為憲宗製

長生藥憲宗服藥殞生遂杖殺柳泌後世咸以為允

當今可灼進藥而光廟賓天後謂之誤庸醫誤傷平

人律有明條況誤傷天子乎乃與願命大臣同賜金

帛比屢經論列僅准致任何以解于天下後世有伸

討賊之義者反曰借以快私憾然則董狐歸獄于趙

盾孔子加弑于許止亦謂之私憾耶 李康妃擁田

皇子欲逃封尊號欲垂簾聽政此時君為重康妃為

輕即云踉蹌移徙咎不在外廷也宋韓琦立撤太后

之簾即時還政迄今嘉其功而服其胆不聞以為罪

也今日貪定策曰希非望將必奉呂雉以臨朝聽武

聖之改號然後為不貪為無希望耶又曰憑几之遺
言委諸草莽待封之宮眷視若寇仇則盍思選侍趙
氏非待封宮眷乎見逆客魏即勒令自盡莫敢說冤
而李有仇非孝和遺言乎結歡客魏雖在天隱恨獨
致優禮嗚呼哲皇而既如此矣吾于逆賢乎何尤于
諸臣乎何尤 挺擊之案惠公世揚主持甚力遂為
羣奸所深恨要典既修徐大化孫杰重舉青衣入內
合謀定策逮惠公下獄三法司于城隍廟鞠問周應
秋問公曰尔道徐熙寰即大孫萬我即是好人否公
曰好人也應秋曰汝何故參之曰此正犯官愚處犯
官罪該死情愿死耳應秋喝責三十板肉開骨露幾

登鬼錄爰書稱為扞綱之頑冥正指此語遂以交內
樞大辟逆賢欲俟要典修成布告天下然後梟惠公
首以之定案適熹廟賓天得免後崇禎御極即與釋
放之旨頒行矣猶有奮筆此牘改斬為成者噫奸險
甚矣

六年正月敕諭東廠太監魏忠賢我祖宗建都于燕賴
東南漕運以給兵餉若北新倉主事李桂明倖濫科甲
潛懷穿窬心如廁中碩鼠形如梁上鷦鷯不思粒米皆
萬民脂膏竟以汝潤一家囊橐偷盜之米已盈二千
九百石之多入己之賍已有一千八百兩之數賴尔忠
賢甘勞怨而如飴獲臺諫所未糾去貪剔蠹嚴勒還倉

蓋一舉而上關國計下儆官邪茂績如斯褒嘉何靳除
賜銀幣羊酒外仍增蔭獎勵

此為獎勵之始 李柱明雲南人為惠世揚門人惠
公逮入都時柱明周旋不避形迹故及于禍

上傳諭吏部都察院犯官王之宗周宗建張慎言熊明
遇方大任等及已故陶朗先楊漣左光斗顧大章等家
屬行彼處無按追贓已久如何不見回報顯屬違玩着
傳文各省地方官勒限速解以助大工

事中郭興治疏叅方震孺有旨逮問後竟論斬

御史張汝懋疏論房可壯有旨着撫按提問追贓時邵
輔忠得幸惡房可壯傳逆賢意懸京堂缺今御史高弘

圖論劾弼圖不應有旨斥去汝懋遂應募已票逮問矣
適熹廟偶怒逆賢遂得免汝懋疏內有云一代之興必
有一代規模之槩豈逆賢不軌已露汝懋有佐命之思
乎不然一代之興是何言歟

山西巡撫柯景巡按安伸問明張慎言遣戍回奏奉旨
張慎言黨邪害正鑽差避差罪難枚舉今以監守自盜
姑依擬永戍其周宗建贓私談撫按久不回奏聽其逍
遙無忌成何法紀繆昌期已經削奪仍繡衣黃蓋開館
招賓更見縱肆即着錦衣衛着的當官旗將周宗建繆
昌期扭解來京究問天啟初年貴州巡撫缺叙應屬安
伸都察院具題伸怒叅經歷何顯宗謂其庇張慎言而

以貴州差陷已有旨以規避降調逆賢用事賄求曹欽
以薦起原官出按山西即旨結其獄擬慎言永成竟刺
其臂周公宗建任仁和知縣與浙人頗密選入御史當
事擬例轉福建副使時郭鞏新從田間起其鋒甚惡與
忠順香火情深人莫敢櫻其鋒周公愿擊鞏自贖遂連
鞏攻之鞏卒請告去後忠賢專政鞏等力修舊怨故及
于禍

公昌期與高邑應山諸公相善門戶黜陟與叅未議
然抑揚過當又牽以愛憎故多不滿人意應山被譴出
都公攜盒道旁款語良久而別與代州之說相符忠賢
恨之其疏請告也小閹傳語內閣云縲昌期放他去罷

者得在此送客隨奉嚴譴歸里新撫蒞任公同郡紳進
謁偵事者見之遂以入告故及于禍

獲杭織造太監李實疏參前任應天巡撫周起元及鄉
紳高攀龍周順昌李應昇黃尊素有旨周起元等俱着
錦衣衛差的當官旗扭解來京究問諸公先後逮至俱
下鎮撫司各坐贓追比拷掠慘酷死獄數日始有旨領
埋而肌膚毀爛不可識別矣

李實齷齪不識字然非忠賢黨黃尊素時至湖上不避
刑此與實往來人遂謂諸君子將以實為張永也此語
流傳都下忠賢疑之實司房知其事大懼求解于李永
貞永貞代州此疏司房出實空頭奉上之

周公順昌吳縣人癸丑進士筮仕福州府推官時稅監高家勢凌郡邑晉謁者如撫按體公抵任獨不往家恨甚其帳下某者以他事逆撫軍委周公往捕同官皆難之太守勞永嘉約與同見辭其事公諾之矣既退自思一衙役不能擒何顏稱司理遂謝太守獨往執其人以解撫案大怒趨入轅門與撫大鬪監司呂純如為和解之案執純如歸署須周推官至乃釋撫以謂公之不可守守無如何以是得強項聲俸滿行取畝授禮部寒素如貧儒不特干謁屏謝即交際亦峻拒不納至地方利病又必明目張胆上說下教必見之施行然後已吳中士民無不愛戴之江南司官缺選郎中陸榮卿采輿望

以公薦公既入吏部飲冰茹蘗較前加勵壬戌署選預敘諸應選人以次挨授吏無能上下其手蓋百年所希見也給事趙時用揭中有微語相及既決意乞假出都之日真八百孤寒齊下淚矣歸里後操守更峻申說利病吏動士民愛戴亦更切嘉善魏公大中被逮過吳門公與周旋復以季女字其孫口斥逆賢不稍避忌緹騎還歸盡以寔告又以他事痛詈新撫毛一鷺及呂純如兩人比而媒蘖其短漕儲道朱國盛復左右之于是李實之流列公名矣開讀之日一郡罷市不期而集者數萬人號冤之聲上徹雲霄求撫按特疏保奏撫按以套語支吾衆擁持不得進緹騎候久不耐以刑具列堂下

大呼曰安在且以巨槌擊諸人衆心憤極即奪巨槌反擊緹騎瞬息間萬聲鼎沸雖黃童白叟皆攘臂奮勇按不能禁與郡邑俱披靡以出緹騎斃者二人餘皆四下逃竄而緹騎之至浙逮黃尊素者挾勢需索如故衆復走胥江城下焚其舟投其橐于河緹騎倉皇星散所費駕帖遂失不知所在時衆怒如城公哀辭諭令解散衆弗應當事乃匿公別署揚言候旨始發而俄以一夕調兵水陸整旅護公乘小舟渡關泊曠野間乃敢宣詔從州莽畢事時忠賢所遣偵事人在吳者浪鎗星馳告曰江南反矣盡殺諸緹騎矣次至者曰已劫順昌而堅旌城門一晝閉矣又次至者曰已殺都御史絕糧道而

劫糧艘矣忠賢聞之大怒以咎呈秀跪而數之曰若教我輩建五人今且激變矣奈何呈秀惶怖叩首請死忠賢叱之出李實聞變亦閉門痛哭兩目盡腫比中丞疏至崑山遠病悸不能出貴池當代擬忠賢至閣強為厲色語曰上怒甚必欲盡誅為亂者貴池曰公誤矣夫京師仰東南漕粟以百萬計今運期在迩地方有事正當示以寬大而復以嚴旨激之果有他故誰任其咎忠賢不應而入涿州意獨不然當擬票時從貴池手攘去握筆欲書而意緒忽茫然不能措一辭忠賢促之迫貴池復擬旨以進有奉日解散姑不深究之句迨中丞再疏三疏至會貴池以病卒崑山出視事復有漏網渠魁等

語部輔忠貽書毛撫急以文某姚某入告少宰虛席以
待蓋指文、肅、姚、文、毅兩公也。毛撫勿為動止，擒顏佩
卓揚，念如周文元馬傑、沈揚五人，具獄斬之。五人當訊
鞠，無一語自辨。第曰：周吏部受禍若此，我等小人當為
之死。又何言哉？皆談笑受刑。周公既下詔獄，忠賢與其
常密謀，宮中意更有所羅織。時忽地震，當坐處鴟吻，無
故自墜。所幸二小璫皆擊死，而逆賢得免。俄頃有聲如
轟雷，從西北起，震撼天地，黑雷乘之，簸蕩壞民居室，數
里無存。巨石從空飛注如雨，男婦死者以數萬計。驢馬
雖大，殆盡斷臂折足，破頭抉鼻者枕藉街衢。又王恭殿
藏舊火藥，發驚象，狂走民人，遭踐踏死者更无算。忠

賢革因是咸有戒心，緹騎亦相戒不敢南下。即黃尊素
駕帖已失，第行撫按起解，不復差官旗矣。

高公攀龍、叅崔呈秀寔李公應昇代草呈秀往高公門
長跪，祈哀。遶李後內出呈秀，搏頰求援。李勿為禮，呈秀
恨之。故李與高俱不免禍。緹騎未至前一日，高公預知
之言，笑自若。次早家人覓公不得，案上留遺表一通，書
云：臣雖削奪舊係大臣，大臣辱則國辱，故臣北面稽首
。微屈乎之遺則君恩未報，願結來生。臣高攀龍垂絕謹
書。乞使者代奏家人，急求得之。池中則已逝矣。水僅濡
下體，北面捧心，屹立不動。蓋公學問以敬為主，真誠無
妄，已臻極詣。故去來之際，解脫無碍云。

李公被逮之日未開讀先常民一時集者數千人與蘇州不約而同欲擊官旗知府曾櫻再三曉諭撫慰始得解散官旗亦頗畏懼且多方用情不遺餘力云

六年六月浙江巡撫潘汝禎首疏請建東廠太監魏忠賢生祠畧曰東廠魏忠賢心勤體國念切恤民鑒此兩浙歲遭災傷頓蠲茶果鋪墊諸費舉百年相沿陋習積弊一旦釐革不但機戶翻然更生凡屬茲土莫不途歌巷舞欣相告戴德無窮公請建祠用致祝釐等因奉旨據奏魏忠賢心勤體國念切恤民閔兩浙連歲遭傷革百年相沿鋪墊宜從衆請用建生祠著即該地方營造以垂不朽 祠名永思 巡按劉之待疏同 又新

任巡按徐吉疏敘督理各官織造太監李實捐貲置買贍田以供香火俱奉俞旨

此生祠之始後此效尤成風矣時內閣崑山顧秉謙元城黃立極涿州馮銓未幾秉謙與銓去位復點平湖施鳳來晉江張瑞圖高陽李國樞諸人中惟高陽猶稍能以禮自持云

禮監掌印太監王體乾請賜魏忠賢客氏金印忠賢印曰欽賜頌命元臣客氏印曰欽賜奉聖夫人各重百餘兩

嗟乎逆閹一內閣也外則請建生祠內則請賜金印流客以宮婦而亦賜印無論其不當有而亦何所用

垂諸史冊寧非爰具請祠請印紊亂國制二人之罪
其密于誅耶而皆未正厥辜真千古有遺恨矣

左都御史周應秋疏稱撫按追贓宜嚴楊漣左光斗家
私鉅萬奉有明旨追助大工迄今尚未清理况各犯其
家不貧此局亦易給而遷延時日若此臣請置循環二
浙遠者四月一繳近者二月一繳庶無沈閣奉旨這條
太深禪憲綱楊漣等贓銀着刻期奏銷

嗟乎應山之居官也向以廉名被逮之日至不能具
官旗賞士民置募冊於四門醵金助之比追贓則家
無餘貲房產變盡合宅棲止城樓今言家私鉅萬狼
豕哉應秋良心喪盡矣狗彘尚欲食其肉耶

崔呈秀始因許秉彛轉引石元輔以進交逆賢後逆賢
出督殿大工呈秀迎坐輒屏人密語馮銓既得志遂與
呈秀爭寵呈秀潛向逆賢譖之遠馮銓與霍維華李魯
生偽造三案以錮諸君子呈秀摘內數語指為暗刺於
是逆賢舊好頓變馮銓始不能安其位矣

御史陳朝輔兵部郎中吳淳夫先後疏叅內閣馮銓并
及趙興邦曹欽程入幕等事有旨責其附和及朝輔再
疏臚列納賄多款有旨馮銓閑住趙興邦曹欽程為民
御史袁鯨劉徽各疏叅吏部尚書王紹徽私暱喬應甲
推轂秦撫奇貪異穢駭人聽聞有旨王紹徽着閑住壬
戌春紹徽乞真定撫缺於選郎語甚卑鄙選郎拒之逆

賢用事遂投身門下薦厯冢宰恨同鄉之不推轂也特以應甲撫秦圖欲盡傾殺之應甲貪婪無恥物議大沸紹徽亦以此敗

御史龔莘肅疏請枚卜并請內外無用有旨下部議李霖生與李蕃先歸南樂之門次入涿州之幕後見涿州寵衰則又與薊州比焉孫杰吳淳夫霍維華等欲推轂薊州入相盧承欽李燦然王業浩劉徽等合謀攻去涿州令陳朝輔先發吳淳夫繼之及涿州既去復以王紹徽在位無由登枚卜啓事于是表鯨劉徽各出疏叅紹徽人虞朝論以外廷枚卜為疑龔莘肅又出疏以堅之紹徽庶其狀遂于辨疏中發其謀曰有所推轂則必有

所摧折者此也眾懼逆賢知之寢其事王業浩閉門不出表鯨抗疏自明自是魯生等遂與孫霍分途矣後呈秀以業浩閉門不出疑其翻局以他事斥逐為民

兵部尚書王永光曰王恭儼之受疏陳時事語頗剴切忤逆賢意奉嚴旨遂引疾回籍

吏部尚書周應秋由御史推陞者也素極貪穢及為冢宰稱官索價每日勒足萬金都門有周日萬之號手復狠辣凡門戶中糾本叅及者輒借推陞題補以供誅求遂至削奪無虛日

兵部尚書崔呈秀母死有旨奪情視事不准守制禮部尚書朱宗道題復卹典直曰在天之靈奏文書時讀至

此熹廟艷然變色用御筆圈出此四字後來祖制凡任
本兵者親族俱不許掌管兵事其法甚嚴呈秀竟用弟
崔凝秀為浙江提兵不特大干祖制亦顯著無將之心
矣

南京吏部虞大復應秋壻也致書應秋云挾泰山以趨
北在壻固不敢厚望入寶山而空回想岳亦不能忘情
也盛為時所傳頌虞後陞江西提學副使

順天府丞劉志選疏叅王之案孫慎行有旨王之案撫
按提解來京究問孫慎行撫按另擬遣戍

應天巡撫毛一鷺問明毛士龍等招繇具奏奉旨毛士
龍着發邊衛充軍僉妻着伍士龍既遣戍甘州以一婢

自隨後復有旨逮問士龍先期遠遁其婢反以地方官
戕殺為辭被駁稱冤地方無如之何僅以廣捕行緝立
案至崇禎御極始自投刑部云

六年八月熹廟幸西苑與小閣泛舟為戲造在水窠深
處忽風起覆舟熹廟與二小閣俱覆水中幸而獲救二
小閣皆溺死御體由是成疾

給事中陳維新疏叅王允成薦張我續有旨王允成撫
按提問追贓張我續候缺起用我續有妾百餘內有逆
賢姪女素以醜惡見憎至是尊重之駕于嫡上携三萬
金為贄稱姪壻叩頭逆賢喜令以五千金助殿工為起
用地陳維新知之即為揭薦

刑部尚書徐兆魁奏辨廠疏備述李柱明李承恩用賄
求劉鐸方震孺居間懇御史溫國奇求寬已寔不知而
司官不法致衙役羣搶李承恩之家皆率屬不嚴之過
宜提問各役正罪奉旨徐兆魁縱容司官吏書受賄賣
法全不知愧強辭飾辨溫國奇執法臺臣反為重犯求
寬都着問住劉鐸犯罪得釋今又代人居間行賄明設
騙局着提問方震孺追贓未完復增一案罪上加罪司
官崔師偃枉法受賍本當杖處姑削籍為民劉鐸素與
魏良卿善鐸前以妖書被逮審係歐陽暉所作仍以原
官候補良卿偶密叩鐸曰當日官旗公費幾何鐸曰三
千金耳良卿戒旗校還之遂為旗校所銜遷其在獄居

聞一事東廠疏叅復逮會其妾以鐸得釋醮謝神祈家
人有怨鐸者以詛咒出首錦衣張體乾即具疏以聞尚
書薛貞新任擬方震孺加絞罪一等斬劉鐸詛咒重臣
決不待時疏入允之司官高默等不遵堂批賣法徇情
俱降三級調任

李承恩者戚畹也有園亭一所為京師冠逆賢意欲得
之托所私諭意承恩不應逆賢怒令李之家人首其違
禁數事捕承恩于獄王體乾奉旨熱審特重答承恩五
十以博逆賢一笑

高默同事湯本沛者亦吳縣人也為知縣三月以貪酷
致激民變考察降五級餽四百金于崑山補上林典簿

拜倪文煥為父引見崔呈秀所以刺辨同鄉者不遺餘力周忠介之禍寔為下石一日呈秀欲引本沛見逆賢同鄉前輩必無幸矣忽中風喘否不果見隨以劉鐸事降調寧非數耶

鎮撫司許顯純具題緝訪事有旨據韓三口供奸輔韓爌受過贓銀二千六百兩着撫按追解勒限速完韓三之獄乃楊維垣搆成也賄案牽陷蒲州薊州等復後中王之王體乾李永貞等先宣言世廟時有夏文愍故事逆賢已有成心幸韓三至死不肖妄招許顯純亦不能代劾捏奏也

楊維垣為座師徐紹吉爭戶部侍郎缺觸南樂之怒曾為逆賢譖之故終逆賢之世効力甚至而官不顯東勝左衛人武長春者以騎射稱雄標銀南下必借重護行沿途劫掠亦所不免羣臣合計令東廠密擒之指為建州奸細于是敕旨褒美內外贊頌特封逆賢姪魏良卿為肅寧伯賜鐵券世襲羣臣猶以為未足復晉封肅寧侯時逆賢威權日盛羣臣獻媚爭奇于是倡為封拜之策云

為事中李森生疏叅徽州知府石萬程有旨削籍為民已乃探花吳孔嘉徽州人也素與族人吳養春吳懷賢有仇二人以富甲江南所為多不法孔嘉令人詣厥首其時二人俱被逮拷死詔獄家產籍官工部主事呂下

開中書許志吉營謀其差抵徽遍地行紮遂激成民變
萬程掛冠長往故魯生特疏糾之

十月上諭內閣朕昔在青宮聞皇祖年間有逆犯皦生
光捏造妖書謀危社稷離間皇祖誣害大臣朕深痛恨
切齒自朕沖齡踐祚之際值東林邪黨盈朝或陷朕孝
德不光或棄祖宗封疆不顧幸荷上天默佑寶璽呈祥
膺朕懍然羣奸敗露其元惡大慙雖復芟除而脇從宵
士不無漏網前已屢、特諭開曉再三欲令革面易心
咸與更始不謂法紀凌替之後人心迷錮已深乃尚有
等未盡奸徒怙惡不悛密弄線索或巧布流言蜚語或
寫匿名文書害正黨邪淆亂視聽鄉等可傳示廠衛都

察院五城巡視緝捕衙門廣布軍番嚴加察訪如有前
項奸徒仍蹈前愆確有的據即先將正身拏住具奏細
細研審必要窮究到底根究造謀主使之入明正典刑
以息邪說昭朕一代平明之治

順天府丞劉志選疏叅都督張國紀罪狀罄竹難書內
訾丹山之穴藍田之種指斥中宮末浚云肘腋重臣殫
忠徇亮協黃中興今聞有伏莽之奸藏頭露尾投間抵
隙思為一網打盡之計伏望天語叮寧緝事衙門嚴拏
究治

御史梁夢環亦疏叅張國紀罪狀即引劉志選丹山之
穴藍田之種等語以傾動中宮有旨張國紀着革去爵

祿回籍省愆中宮懿安張后係乘華劉克敬所選懿安性鯁直數于熹廟前以顛倒舊章為言蓋暗指客魏也客魏恨之時有匿名榜揭于後宰門屏列逆賢反狀并斥逆賢佐命七十餘人逆賢怒疑懿安父張國紀及被逮諸人為之孫杰郅輔忠等欲因此興大獄盡殺林下類似諸人而繇國紀以搖動中宮事成則以魏良卿女進劉志選偵知之首上疏以忝國紀梁夢環遂繼之禍且叵測李國樞力救棟同官共輔得免逆賢猶遷怒克敬并其照管老閹馬鑑俱降戾鳳陽縊殺之俱既殮復蘇衆人俱聞棺中急迫有聲而畏逆賢虐焰遂埋之至崇禎御極始聽歸改葬焉

丙寅秋寧遠被圍急兵備表崇煥固守不下喻月圍始解内外文武大吏咸歸功逆賢僉曰仰賴廠臣指授方畧克奏膚功不有殊典曷酬大勲吏部周應秋等翰林楊景辰等太常寺卿林宗載等給事中吳弘業等御史安伸等南京吏部尚書王在晉等俱具疏頌逆賢功德或合辭或單奏揄揚鋪張懽呼舞蹈旨亦應之如響于是滇音魏良卿為寧國公魏良棟為東安侯時良棟魏止四歲魏鵬翼為平安伯時鵬翼止三歲大小九卿科道等官各加官保尚書都御史太常太僕等銜蔭錦衣者幾千止陞表崇煥為右僉都御史巡撫寧遠地方崇煥以賞薄觖望次年建祠矣靳賞如故乃引疾回籍

七年二月應天巡撫毛一鷺疏請為廠臣建祠虎丘
又大監李實疏請照江西例地方官春秋祭享
前遼撫督閩鳴泰疏為廠臣建祠薊州又疏請祠額內
云人心之依歸即天心之向順恭照廠臣魏忠賢安內
攘外舉賢任能捐金指俸恤軍恤民非但學識綱常之
際獨草其全且于兵農禮樂之司共濟其盛治平績著
覆載量弘亟請祠名用志功德有旨褒美祠名廣恩
順天巡撫劉詒巡按倪文煥梁夢環疏同
鳴泰鋪張功德足示擁戴矣人心依歸天心向順尸
祝之流幾作勸進之箋像安得不冕旒禮安得不五
拜三叩頭也照曰恭照心不勝誅矣

薊州生祠成迎逆賢喜容至巡撫劉詒行五拜三叩頭
禮兵備副使耿如杞見其像垂旒執笏惡之長揖不拜
劉詒遂叅如杞立遣緹騎逮下詔獄打問追贓送刑部
擬罪時尚書薛貞坐以大辟論斬

嗟乎如杞以諂媚成風之日獨能挺立不阿冰霜之
操自足流芳千古而薛貞以其見逆賢像揖而不拜
遂論大辟忍心若此與禽獸又何異焉

前遼撫督閩鳴泰疏請為廠臣建祠密雲昌平通州涿
州河間保定并請祠額有旨密雲祠名崇德昌平崇仁
通州章德涿州弘愛河間仰德保定旌功時劉詒倪文
煥梁夢環卓邁張鳳翼盧承欽等疏同

寧遠巡撫袁崇煥請為廠臣建祠并請祠額有旨祠名
德芳摠督閻鳴泰巡關梁夢環疏同

天津巡撫黃運泰請為廠臣建祠并請祠額有旨祠名
威仁摠督閻鳴泰巡撫卓邁疏同提學御史李蕃疏請
守祠官時黃運泰迎逆賢喜容于郊五拜三叩頭乘馬
前導如迎詔儀及像至祠所安置訖運泰列拜丹墀率
文武諸官俱五拜三叩頭運泰復至像前萬福口稱某
名某年某事蒙九千歲扶植叩頭謝又某年某月蒙九
千歲陞拔則又叩頭謝致辭畢就班仍五拜三叩頭旁
觀者皆汗下決踵運泰揚、甚得意也寧撫秦士文晉
撫牟志夔亦至像前跪稱上公、萬福五拜三叩頭各

備極醜態云

宣大摠督張曉疏請為廠臣建祠并請祠額有旨祠名
隆勳宣府巡撫秦士文宣大巡按汪裕張素養疏同
中書郭希禹疏請將自所置山地二百畝謹捐以祝廠
臣喬松之壽

大同新任巡撫張翼明疏請為廠臣建坊有旨宣鎮赤
城共請坊額以示華夏著與做一代宗功

大同祠成上樑之日王點托病不出急逐之而用張
明翼明至無可獻媚乃請建坊愈奇而愈下矣

山西巡撫曹爾楨疏請為廠臣建祠五臺有旨祠名報
功摠督張曉巡按劉弘光疏同

登萊巡撫李嵩請為廠臣建祠有旨准予府城水城各
建生祠以慰遠人感德文誠寧海縣祠名景仁蓬萊關
祠名留敬山東巡撫李精白疏同

延綏巡撫朱童蒙疏請為廠臣建祠有旨祠名祝恩三
邊提督史永安陝西巡撫莊謙疏同

督理三山工部郎中何宗聖疏請為廠臣建祠房山有
旨祠名顯德又疏稱房山知縣楊濟芳願捐俸銀一百
兩士民高寧等願捐銀二百兩置買香火地附祠以表

崇報

上林苑卿官庶吉士李若琳等疏請為廠臣建祠有旨
祠名廣仁

督理蘆溝橋務工部郎中曾國禎疏請為廠臣建祠有
旨祠名隆仁

巡視五城御史黃憲卿正六年汪若極張樞智鋌公疏
請為廠臣建祠宣武門外有旨俞允

順天府尹李春茂疏請為廠臣建祠宣武門內并請御
製碑文以便營造鄉宮通政司經歷孫如冽疏同祠名
茂勲

上林苑監丞張永祚疏請為廠臣建祠建坊有旨良牧
署祠名存仁坊名功高冊府嘉蔬署祠名洽恩坊名洪
恩流芳林衡署祠名永慶坊名一代元勳

提學御史李蕃疏請為廠臣建祠永安門有旨嘉允時

李蕃在逆賢門下與李魯生周昌晉稱為三傑蕃提挈
大綱數縱指示而已昌晉論人語多暗刺不甚指斥姓
名魯生則曾饒鱗甲華森戈戟遭者無不立碎時為之
語曰一周二李其權無比後昌晉持斧出易以劉徽改
語曰二李一劉其權莫儔橫行一時如此
內閣李永貞者時寂用事家在通州富河庄李蕃特製
扁額送至其第永貞堅拒不納合邑稱之
五月國子監生負陸萬齡疏略曰臣聞縱橫之世楊墨
充塞聖道榛蕪子輿氏起而闢之廓如也故萬世謂孟
子之功不在禹下至今千秋廟貌比隆尼山我明歷聖
相繼聖道昭明不意顯皇帝中年東林始盛自立旗幟

欲釣高名忍捏浮詞污鱗君父誣先帝為不得令終陷
陛下為不能善始罪惡滔天聖學墜地此孔華之所必
誅孟舌之所不赦也恭遇申獄毓靈尼山吐氣篤生聖
輔替厥魏忠賢提不世之貞心佐一朝之乾斷披丹開
道首勸鑿興視學竭力匡勸立補累朝缺典而且清軍
實以壯國威捐逋稅以甦民困宸居遶建而九賦無增
藩邸同封而四方不擾其寂有功于世道人心為聖門
攸賴者芟除奸黨保全善類自元兇就繫而天下翕然
稱明此即厥臣之誅少正卯也自要典昭垂而天下翕
然稱明此即厥臣之華削春秋也朝廷之上昔為魍魎
糾結之區今日何由開朗孔孟之門昔為邪慝冒借之

審今日何由清明是啟臣驅蔓延之邪黨復重光之聖
學其功不在孟子下臣等涵濡啟臣之教佩服啟臣之
訓念帝都為起化之地國學為首善之區伏願于監西
教建啟臣生祠後楹即祀寧國先公與啟聖先聖之祀
同舉並行更願皇上製碑文一道勒石顯揚奉旨自東
林邪人聚徒簧鼓淆亂國是搆釁宮幃朕甚恨之賴啟
臣獨持正議匡挽頽風一時門戶之奸若鏡照胆而朝
仁孝之徽如日中天功在世道甚非渺小至于安內攘
外剔蠹除奸免稅捐逋扶良抑暴矜弁之徒得以帖席
無帶家誦戶弦皆啟臣恩德所被太學諸生請于國學
建祠祝釐具見彞好即着鳩工舉行

五軍都督府錦衣衛等衙門公侯伯駙馬等官博平侯
郭振明等公疏畧曰神宗末造奸人標榜為邪是非蝕
賞罰暗遂至綱紀日清內外蜂起邊疆失守頓陷全遼
乃社稷有靈篤生啟臣獨受遺命一秉忠貞但知有皇
上不知有羣臣但知有社稷不知有富貴但知有祖宗
之法度不知有奸壬之把持故三朝要典一旦煥然此
啟臣宜堂宜楹之元功也至若邪奸逐而是非明巨慙
僇而賞罰肅穢經法而閭外之盜臣喪胆穢部逮而內
外之貪墨寒心擒武長春而敵人之計敗露宗社奠安
在皇上崇德報功自有凌烟之像雲臺之圖臣等戚臣
也衣租食稅歌咏太平寧敢忘啟臣奠鼎之功各願捐

賞建祠乞賜額名以垂永久奉旨這本所奏敝臣志存報國功在真鼎斥邪以正墨剔蠹以去奸擒間諜而隱憂消備軍儲而邊威振筭聯屬國氣攝外邦其種、勞績朕所素鑒所請建祠致祝允協輿情如議行祠名與敝德芳

保忠侯梁世勛疏請為敝臣建祠并請祠額祠名著愛武清侯李誠銘疏請為敝臣建祠并請祠額祠名鴻勳靈壁侯湯國祚襄城伯李守鐸各疏請捐貲附祠共祝山東巡撫李精白疏請為敝臣建祠內云敝臣仁威彈壓乎山川濺澤滲漉乎中外堯天之魏蕩帝德難名時雨之沾濡元勳丕著有旨祠名隆禧河道總督李從心

參差巡撫李嵩山東巡按黃憲卿疏同又有旨祠名湛恩一祠二額于是議兩殿公懸撫前而按後李精白先以麒麟歸瑞具疏奏聞即累送其第至是請祠請額極力揄揚黃憲卿在京已一再建矣抵任復疏總請上梁之日二臣俱親詣展拜擬柱聯云至聖至神中乾坤而立極乃文乃武同日月以長明精白以多福多壽易乃文乃武四字蓋惟恐頌禱之未至也濟南巡道副使梁廷棟屆期竟不至祠所內閣李明道至河干部道俱手板堂參廷棟以客禮謁于舟次李閣送不登岸廷棟亦竟行不顧即堅請終養云

河南巡撫郭增光巡按鮑奇謨各疏請為敝臣建祠

賜名戴德此祠毀民房二千餘間起建宮殿九重宏麗
為古今所無建標祠所直書大工見者駭嘆蓋大梁守
道周錡祥符知縣李寓庸為之也

嗟乎如朱童蒙建祠僭用琉璃瓦毫無避忌閣鳴泰
公然稱人心歸依天心向順李精白公然稱堯天魏
蕩帝德難名夫逆賢而堯天帝德矣將置熹廟于何
地邪故逆賢雖未必有不軌之心而奸黨已顯著擁
戴之形矣

總督漕運太監崔文昇鳳陽巡撫郭尚友巡按宋禎漢
巡漕何早巡鹽許其孝公疏據漕儲等道朱國盛等工
部等官顧民畧等知府劉應召等知州沈起津等知縣

劉芳達等合詞請建殿臣生祠有旨祠名瞻德
提督臨清工部侍郎吳淳夫疏請為殿臣建祠一名萃
德東昌知府王堯民收進建祠募疏不獲淳夫遂叅堯
民

長蘆巡鹽龔萃肅疏請為殿臣建祠一名留恩時撫按
建祠已著萃肅名矣萃肅曰同衆烏見葵忱遂具疏獨
建鋪張稱頌詞極斐豐曲盡諂諛之私

嗟乎萃肅既有內外無用之疏以媚崔呈秀今復獨
任此舉媚骨一副到處頂尖出色

湖廣巡撫姚宗文疏請建祠一名隆仁鄖陽撫治梁應
澤巡按溫臯謨疏同時應澤復欲建祠于鄖陽荆南道

蔡善繼不肖申詳迫之至再善繼以掛冠爭之應澤叅
善繼疏出矣忽聞熹廟晏駕追回

楚王華奎疏請捐金一千兩助建祝釐有旨嘉允

嗟乎方城漢水作帝屏藩逆賢雖焰何德之感何威
之劫獨有此舉豈往日之驚魂尚未定歟

河東巡鹽李燦然疏請為廠臣建祠名褒勛山西巡
撫牟志夔巡按劉弘光疏同

淮揚巡鹽許其孝疏請為廠臣建祠名瞻息撻漕巡
撫郭尚友巡按宋禎漢疏同此祠上梁之日熹廟哀詔
已頒其孝等哭臨畢仍脫衰經易吉服相率往拜還復
易服哭臨旁觀者咸為咋舌云

三邊總督史永安疏請為廠臣建祠名懋懿陝西巡
撫胡廷晏巡按莊謙疏同

各省申詳建造逆祠司道府等官

江浙山陝楚豫七省布按兩司等王道元等

密雲兵備道張維世 昌平兵備道張福臻

秦州兵備道王化行 霸州兵備道甯三翰

宣府兵備道張宗衡 宣府糧儲戶部王珍

河東兵備道蘇進 榆州兵備道楊嗣修

運綏糧儲戶部夏如亨 磚廠工部周延

長蘆運同孫鳳翔 淮揚運同沈侍卿

河間知府王建泰 廬州知府劉應名

登州知府王廷試
無為知州沈起津
登州鄉官左之宜

大同知府李樹初
合肥知縣劉芳達

按計建祠共四十所作備者潘汝楨也疏請祠名者
閻鳴泰也稱功頌德揚詡贊歎者亦駢語相荅四明
之流其品定于此矣疏與旨不全錄者不勝錄也錄
陸萬齡疏者侮先聖而毀名賢人之無良一至于此
也獨是諸臣既為逆賢也人自不敢不為逆賢也用
至楚藩之捐助勛戚之建祠獨何心乎蓋與國同休
戚即使改唐為周革漢而莽尚賴朱虛之誅諸呂太
尉之入北軍今乃齊心擁戴罔念國恩嗚呼其肉豈

足食乎至郭振明儼然陸萬齡後勁矣生何以覘顏
稱世爵死何以對二祖列宗也定逆案時竟不及之
而史永安梁夢澤張鳳翼公然漏網守正之蔡善繼
等亦無格外之旌嗚呼蒲州諸公不得辭其責矣

禮部題請應天鄉試主考有旨陳具慶張士範俱着陞
翰林院侍講玄舊例兩京鄉試俱用官坊蒞事逆賢抑
左庶子孔貞運何吾騶等而特簡陳具慶張士範主應
天試徐時泰孫之獬主順天鄉試俱從編簡超陞侍講
真創見也順天中式崔呈秀子崔鐸應天中式周應秋
子周錄浚皆以廷臣論劾褫革崔鐸本房中書林萃芳
周錄本房江陰知縣岑之豹是時主試者無不極力獻

諛浙江主考陳盟論題巍乎惟天為大惟堯則之孟
題文王以民力為臺為治而民歡樂之謂其臺曰靈臺
謂其治曰靈沼蓋西湖逆祠甫落成也應天擬題有擬
此謂惟仁人為能愛人為惡人者張士範矯手頓足歎
為絕妙得未曾有同考武進知縣岳凌霄抗眾對曰今
日之事上固不可得罪于朝廷下亦不可遺譏于清議
這能惡人三字也覺忒傷天地之和張面赤不能應陳
具慶以冷語解之張次題仍出見而民莫不敬言而民
莫不信行而民莫不說是以聲名洋溢乎中國施及蠻
貊湖廣李明睿錄敘備列諸闈姓名江西主考倪元璐
孟題出皜皜乎不可尚已時方擬逆賢于先聖建祠國

學司業朱之俊揭示通衢云上公之功在禹之下孟子
之上故倪公以此暗駁之三場策問有云強毅養外病
攻其內今如見標病不急亦已矣倘亦曰內食實甚則
當有厲後之者救焚追亡紆步豈足貴乎又曰天下之
變生于猝而計立于豫自命之士智略輻輳其意乃欲
仰射天狼而豕奔肘下顧愕哈反走此可嘆也復引王
文成備宸濠等語曰學者牖戶之謀參于性命豈必驚
湖所廢誦哉使逆賢不敗則倪岳二公禍不測矣
兵部右侍郎霍維華疏稱袁崇煥有陸無蔭功高賞薄
乞以已蔭讓崇煥以昭公道末點崇煥談款之悞有旨
切責

六年秋熹廟受溺成病至七年夏加劇遍走羣望有加
無瘳霍維華聞之進獻仙方靈露飲其法取上糯大米
淘淨用甑蒸熟內放銀瓶蒸吸其汁飲之熹廟初服頗
覺甘美久之傳諭不用而聖躬日漸浮腫醫藥罔效逆
賢大愠誚責維華維華知不可收拾遂故作相左之態
因表崇煥請告急出此疏初維華以崔呈秀吳淳夫薦
起用其妾有為逆賢甥孫者刺因稱愚甥孫婿海內笑
之持公封讓子蔭知兇局將敗眼明手快故為異同也
禮部題請國子監秋祭有旨着寧國公魏良卿行禮國
學丁祭例遣相公代奠丁卯八月禮部來宗道獻諛題
魏良卿往行祭之頃怪風暴起殿上燈燭盡滅良卿驚

悸仆地久之始能出聲未幾即有駢斬之禍

七年八月二十六日熹廟崩于懋勤殿孫留不發逆黨
獻計欲令宮妃假稱有娠而竊魏良卿子以入忠賢輔
之如新葬之于孺子嬰也忠賢納其說令人婉諷懿安
皇后懿安力拒不可曰後命亦死不後命亦死等死耳
不後命而死可以見二祖列宗在天之靈忠賢無以難
之乃承命召皇弟信王信王既入宮深戒濟陽之覆轍
復切南坡之異謀乃屢賜溫詞曲加慰勞忠賢等心乃

皇弟信王即皇帝位大赦天下改元崇禎大行皇帝謚
曰哲皇帝廟號熹宗初禮部擬僖宗成皇帝御筆改僖

為其改成為括

新任南京通政使楊所修疏叅崔呈秀奪情周應秋貪墨吏科都給事中陳爾翼疏言聖主當陽衆正布列而東林遺孽潛伏長安希圖翻局乞敕下廠衛衙門嚴行緝拿云

楊所修由給事陞僕少亦彼黨頭目也推為南通政心甚不悅知局必敗因與同黨陳爾翼李蕃等謀思將累年惡業盡卸之崔呈秀而叅去之以自解又以周應秋在銓介穢無恥議并除去以孫杰代之仍轉所修于北然沒糾合衆力共持殘局故所修先發陳總之李又總之所修疏上內微點崔呈秀後入應秋呈秀聞其謀至

都察院罵李蕃不敢動又指孫杰罵之曰爾身後何得爾官從何得乃大家相圖如此杰惶恐不能對呈秀因以清查經管錢糧挾杰且曰必令爾翼出駁所修差可恕耳杰唯呈秀始去次日爾翼緝拿東林遺孽之疏出矣

江西巡撫楊邦憲疏廠臣功德巍巍事奉旨已有旨了邦憲疏進上且閱且笑又不發票忠賢規知之急出疏辭免曰微臣久抱建祠之愧事奉旨建祠祝釐自是輿論之公廠臣有功不居更見勞謙之美准辭免以成雅志

廣西巡撫王尊德疏請建祠右通政呂圖南急付還來

後泯于無形後尊德遂以未嘗建祠稱守正不阿陞兩
廣總督

十月御史楊維垣疏劾崔呈秀

徐大化浙產也占居京師倡封疆之議以殺楊左得魏
忠賢之懽心由三次考察部郎不二年躡躑尚書夤緣
曾理大工尅減錢糧無筭後受銅商厚賄那借惜薪司
內庫銀二十萬掌司太監程呈芬妬其專利力詆于忠
賢勒令閑住至是睹璫局將敗與表姪楊維垣密謀令
恭呈秀以為翻身地疏中雖劾呈秀猶曲護忠賢內云
厥臣公而呈秀私厥臣忠而呈秀邪厥臣猶知為國為
民呈秀但知貪錢壞法等語有旨奏內奪情事先帝念

朕工未竣屢旨自明不得苛求

工部主事陸澄源疏論魏忠賢崔呈秀畧曰忠賢服事
先帝贊籌邊務拮据大工亦人臣分內事何至寵踰開
國爵列三等先帝聖不自聖每詔旨批荅必歸功厥臣
外廷奏疏不敢明書忠賢姓名盡廢君前臣名之理甚
至祝釐遍于海內譽之以阜夔尊之以周孔且當時之
卑峻周孔亦未嘗有是贊美惟漢代王莽稱功頌德者
至四十八萬八千餘人忠賢誠賢必不屑與之合輒至
若崔呈秀貪淫奸惡罄竹難書臺臣茅舉其涯末耳即
奪情一事在先帝時曰大工未竟也今大工竟矣尚復
竊據本兵意欲何為耶有旨陸澄源新進小臣如何出

任安言姑不究呈秀隨出疏請罷有旨准回籍守制
兵部主事錢元愨疏劾魏忠賢畧曰崔呈秀滅倫絕義
傷取名教皇上下奮乾綱鋤而去之臣竊謂忠賢尚在
根源未淨禍機終伏也皇上倘念忠賢事先帝微勞貸
以不死亦宜勒歸私第散死士輸蓄藏使內廷無厝火
之憂外廷無尾大之慮彼魏良卿輩速令解組褫紳長
為農夫以沒世即以彰皇上浩蕩之恩而為忠賢自全
之策矣有旨錢元愨小臣如何又來多言姑不究
嘉興貢生錢嘉徵疏劾魏忠賢畧曰竊見權奸肘腋道
路寒心如魏忠賢者可一日追四凶之誅緩魑魅之投
戎謹列其十大罪一曰並帝二曰蔑后三曰弄兵四曰

無君五曰無聖六曰剋剝藩封七曰濫爵八曰朘民九
曰掩邊功十曰通關節伏乞聖上獨斷于心敕下法司
將魏忠賢明正典刑以雪天下之憤彰正始之治有旨
魏忠賢事體朕心自有獨斷青衿書生不諳規矩姑饒
這遭

戶部員外王守履疏奸臣罪狀等事奉旨這所奏崔呈
秀罪狀明悉着先行削了職為民追奪誥命俟會勘定
奪陳爾翼三疏自相矛盾是非反覆着冠帶閑住

東廠太監魏忠賢疏奏患病不能供職事奉旨魏忠賢
准私家調理隨諭王體乾掌東廠印高時明掌司禮監
印

大監徐應元疏奏君恩愈深等事有旨徐應元准私家
調理應元為信邸承奉忠賢黨也以後龍陞司禮秉筆
忠賢既出應元力任善後之托上曰其告病即准休致
湯滴鳳陽

上御內教場閱操，畢令諸武闈俱赴兵部領賞諸武
闈既盡出傳諭內丁着各散歸私宅不許復入而肘腋
隱憂請于俄頃次日早朝諭寧國公魏良卿降指揮使
東安侯魏良棟降指揮同知安平伯魏鵬翼降指揮僉
事

十一月降魏忠賢淨軍發往鳳陽猶隨從甚衆上諭兵
部逆惡魏忠賢擅竊國柄蠹盜內帑枉陷忠直草菅多

命本當肆市以雪衆冤姑從輕降發鳳陽乃巨惡不思
自改輒將素蓄亡命之徒身帶凶刃不勝其數環擁隨
護勢若叛然朕心甚惡着錦衣衛即差的當官旗前去
扭解押赴彼處交割明白所有跟隨羣奸着該撫按官
即行擒拏具奏若有疎虞責有攸歸尔兵部馬上差官
星速傳示時忠賢與腹璫李朝欽行至阜城投宿次嚴
旨既下朝欽先知之密告忠賢俾自為計後衆立刻星
散忠賢自度不能免取酒與朝欽痛飲至四鼓俱縊于
旅店崇禎元年二月順天巡按卓邁等奉旨將忠賢磔
之梟首河間府西門

客氏于九月告歸私家十月奉旨籍沒步赴浣衣局收

管十一月命乾清宮牌子趙本岐臨局咎死尸發淨樂
堂焚化其子侯國興與魏良卿同日棄市其弟容光先
與婿楊六奇發烟瘴地面充軍

李永貞者忠賢名下取用事忠賢既退永貞即辭歸私
家與名下丁紹呂等密謀擁戴徐應元應元南謫復與
紹呂醜王體乾王永祚王文政各銀五萬兩三閹俱獻
進御前後降淨軍承天安置次年以李實空本係永貞
填寫有旨逮問法司擬決不待時即正法焉

崔呈秀聞忠賢之訃隨即自縊法司擬交結近侍官負
律斬其子崔鐸弟崔凝秀與魏志德魏希聖魏希孔魏
希孟魏撫民楊文昌楊胤昌董芳名馮繼光傅之琮楊

昌祚王祿蕭惟忠俱擬烟瘴地面充軍其魏良棟冒封
東安侯年僅四歲魏鵬翼冒封安平伯年僅三歲冒襲
錦衣崔鏜年僅七歲崔鑰年僅三歲有旨崔呈秀于薊
州斬首示衆魏志德等俱發烟瘴地面永遠充軍魏良
棟等既狹童無知准釋放以彰朝廷法外之仁

廷臣追論忠賢之黨都察院司務許九臯照叅田爾畊
李實涂文輔有旨田爾耕先行削了籍為民其家產及
各處店舖着撫按即時封固盡數籍沒以充邊餉李實
着降做奉御發南京新房閑住涂文輔着降做小火者
發鳳陽司香

給事中李覺斯照叅忠賢十狹兒五虜五彪有旨着三

法司會議具奏五虎謂吳淳夫李夔龍田吉倪文煥孫杰移天換日者遂以已死之崔呈秀易玄孫杰苟且塞責五虎謂田爾耕許顯純崔應元楊寰孫雲雀時刑部尚書蘇茂相左都御史曹思誠大理寺署印少卿姚士慎皆璫孽也曲加護持引職官受財枉法律發附近衛所充軍終身倪文煥追贓五千兩吳淳夫三千李夔龍田吉各一千兩解助邊餉田爾耕許顯純引職官故勘平人因而致死律監候處決崔應元楊寰孫雲雀引刑官不論情輕重輒用慘刻刑具律發邊衛充軍讞上輿論不平之甚劉志選梁夢環薛貞皆相總論列就逮而內外蒙狗起解無期給事中曹師稷因昌言虎彪為逆

璫腹心同惡相濟按以交結之律寧有首從之殊乃牽引尋常貪酷職官例律巧為諸奸出脫且監候必于原籍充軍必于附近物議沸騰豈曰無因今劉志選梁夢環李永貞並奉旨提問矣竊恐法司復祖前人故智以護虎彪者護諸奸也御史吳煥亦照言昔年被禍諸臣朝聞命而夕就徵至不敢入與妻子訣今虎彪諸奸雖屢奉明旨而詔書掛壁任意優游如劉志選梁夢環曹欽承輩皆大憲巨奸或燕處于園亭或潛藏于京邸與坊有靈朝廷無法薛貞以廟堂執法之官為璫黨行刑之手公然抗疏陳辨云

考選命下新咨科道彈擊璫黨無虛日于是璫輔黃立

極施鳳來張瑞圖璫冢周應秋及璫所拔用九列郭允厚房壯麗孫杰來宗道陳九疇呂純如阮大鍼等咸次第斥逐回籍

上既處逆賢即欲定逆案閣部僅以四五十人列案以請上怒其不稱諭以諛頌贊導速化為題且云忠賢一人耳苟非外廷逢迎何遽至此及舊輔韓爌起自田間上召同三輔冢宰王永光入有黃袱包一事指示曰此皆紅本媚璫實點也當一、案入之而爌等以不習三尺對永光以吏部止習考功法不習刑名對上乃令都御史刑部同事時張瑞圖來宗道俱不列上問故閣部辭以無事實上曰瑞圖以善寫為璫所愛宗道題崔呈秀

父卹典稱在天之靈可惡如此又問賈繼春何以不處永光言其請善待選侍不失厚道後雖改口稍覺反覆其持論亦多可取上曰惟其反覆所以為真小人俱命增入遂定逆案頒行天下

摠逆黨而論首通內閣王體乾劉崇者烏程故輔沈淮也造謀殺人羽翼逆賢者魏廣微崔呈秀等也首票內閣出鎮降虜主試各官削奪追贓一切嚴旨鋪張逆賢勞績亟允生祠建造者顧秉謙也擠韓爌朱國楨朱延禧者廣微為馮銓前驅而擠廣微者即銓也擠銓者又呈秀也謀興大獄圖報復者馮銓崔呈秀徐大化楊維垣等合謀也既而以嚴旨逐廣微引

祖制設立紅牌及處決熊廷弼者為銓筆也助銓殺廷弼者徐大化等也部題崔呈秀父卹典僭稱在天之靈竟等子二祖列宗者來宗道也題逆孽魏良卿代熹廟郊天享太廟釋奠先聖者亦宗道也援徐中山王例請封逆賢而公者豐城侯李承祚也熹廟疾篤矣尚致揭逆賢欲進寧國而王見嗤于王朝用者崔呈秀也熹廟將崩召信王矣閣中撰一獎敕羅列逆賢功勛力摹曹操九錫文者黃立極等也信王正位矣猶致書魏良卿欲為逆賢造滲金像者大梁守近周鏞也其在內羽翼布惡者王體乾為首李永貞李朝欽徐文輔石元雅等為後也嗚呼外臣如此內

閣輩又安足責矣

欽定逆案

吏部都察院接出 聖諭朕惟帝王憲天出治首辨忠邪臣子致身事君先明逆順經凜人臣無將之戒律嚴近侍交結之條邦有常刑法罔赦豎逆魏忠賢猥狎下才備負給使傾回巧智黨藉保阿初不過窺嚙笑以市陰陽席寵靈而饗富貴使庶位莫假其羽翼何蠢尔敢肆其毒痛乃一時外廷諸臣朋奸誤國實繁有徒或締好宗盟或呈身入幕或陰謀指授肆羅織以屠善良或秘策合圍握利權而覓兵柄甚且廣興祠頌明効首功倡和已極于三封稱謂浸擬于無等誰成逆節致長

燎原及朕大寶嗣登嚴綸屢霈元兇逆孽次第芟除尚有飾罪邀功倒身竄正以望氣占風之面目誇發奸指佞之封章跡其矯誣烏容錯貸朕鑒察既審特命內閣部院六臣將發下祠頌紅本叅以先後論劾奏章臚列擁戴諂附建祠稱頌贊導諸款據律推情再三訂擬首正奸逆之案庶于五刑稍寬脇後之誅及茲三褫其情罪輕減者另疏處分姑開一面此外原心宥過縱有漏遺亦赦不究自今懲治之後尔大小臣工宜洗滌肺腸恪修職業共遵王路悉斬葛藤無曠官守而假事講張無急恩讐而借題叅舉朕執是非以衡論奏程功寔以課官方有一于斯必罪不宥尚各懲毖乃亦有終欽哉

故諭

大學士韓 等一本為遵奉 聖諭事崇禎二年正月

二十四日大學士臣韓 李 錢 吏部尚書王 都

察院左都御史曹 蒙召見文華殿恭領 聖諭朕覽

吏部文書見冢臣欲定附逆諸人項款然必先正魏忠

賢崔呈秀客氏首逆之罪次及附逆之人欲令附逆等

次又須有所憑據今發下建祠稱頌諸疏卿等密與王

永光曹于汴在閣詳閱如事本為公而勢不得已或素

有才力而隨人點綴須當原其初心或可責其後効惟

是者開諂附傾心擁戴及頻 頌美津 不置併雖未

祠頌而陰行贊導者據法依律無枉無徇期服天下後

世之心此番懲治之後縱有漏遺俱赦而不究務斷葛藤並不許借題叅舉卿等只在數日內確定來奏不許中書叅預不可延緩露洩特諭欽此二月初九日臣等再奉 聖諭據卿等奏准召刑部尚書喬允升同卿等叅定欽此臣等仰遵 諭旨先將茲下祠頌等本逐一看詳續據部院二臣開進各官姓名事蹟互相叅對謹以 聖諭分款奏為提衡併陰行賁導在祠頌諸款外者分款書名酌量擬議再同喬 據依律例各附本款具本上請候 旨聞本月二十六日蒙 皇上召對平臺發下臣等原本併前紅本未入各官六十五人又欽心謀大逆凌遲首犯首逆同謀黨孽斬犯逆孽軍犯頌

美為民四款仍奉 面諭在外各官輕者至為民止其原不列名者不妨酌定臣等遵照前 聖諭及欽定續款通將在外紅本及部院開來各官併昨南計附逆奉旨候議各官各照情罪重輕俱依交結近侍律併引名例加減罪例減等分款勲武內臣逐款附後並當具奏臣等切惟尊無二上人臣首戒無將國有常刑天討用彰有罪祖訓內官不許干預政事律重交結近侍官負手以防內外而肅宮府杜奸萌而窒亂源法至嚴矣逆端觀忠墮狡譎多端兇頑無忌始焉小忠小信祇便身圖繼而作福作威漸干國政內則妖姆客氏關覘禁密結為腹心外則逆臣崔呈秀逗露機情助其羽翼成宮

妃而戮忠直盜帑藏而弄兵權已徼無等之三封游議
 偏尊之九錫亟開藩邸迫遠宗城建生祠以卜人心遣
 內饋而連邊將陰謀叵測僭勢顯成磔辟已服上刑爰
 書具列逆狀誠如 聖諭所謂首逆之罪當先正者也
 賴宗社有靈聖明御世乾坤旋轉雷霆合章屬元兇已
 沈誅夷凡黨附宜嚴區別若乃官聯驕跖人類豺狼懷
 私欲借兇鋒拱手隨蠲魁柄或首發大難禍始教猱或
 倒身怙終勢成騎虎有如動搖母后倡和逆封錢券金
 車費頭怨後腴田甲第請給爭先或引聖經以懲愚中
 傳或據火職而抹煞直筆墨縲朝禮忍比罪魁緹騎銀
 儲大興詔獄修暉眦以殘軀命不難殺人媚奸供嘖笑

而效爪牙搃是酬恩報怨至于一人而創祠幾地一事
 而諛頌連章祠省直祠邊鎮祠京都未已也而且祠之
 國學頌碑文頌奏章頌鄉錄未已也而且頌以絲綸此
 則 聖諭所謂首開詔附傾心擁戴及頻、頌美津、
 不置者也而又有徑竇旁通網羅密布腹藏鱗甲搃青
 蛇貝錦之詭意恠鏌錙釀白馬清流之禍即占風望氣
 莫可端倪而覆雨翻雲難逃指視斯又潛施鬼域之毒
 而更巧避虎彪之名 聖諭所謂雖未祠頌而陰行賁
 者也以上諸人罪案各殊法銓亦異或已經褫逐不
 盡厥辜或謀附摧傷當追始禍遵明 聖諭據法依律
 無枉無徇期服天下後世之心三尺無私 天誅不貸

四光畢竄國憲用申惟是大憝既罹不赦之條而羣小
宜開自新之路臣等簡祠頌及部院開來諸臣或事關
鉅費公積列名或身在封疆委蛇濟事或城守全干捍
禦或編摩効有劑調而又或生平才具自傷別歷猷勞
早著 聖諭所謂事本為公而勢不得已素有才力而
隨人點綴須當原其初心或可責其後效咸與昭灑免
贖姓名固明罰教法之嚴條兼赦過宥罪之寬政也臣
等伏奉 諭辭共矢公慎就事論事叅畫一之刑書以
人治人消本來之面目中消衿弁畢麗于科商販兵民
姑置之外倘幸無掛漏可永示誠懲寒亂臣賊子之心
抒心氣幽魂之鬱三章既納金石不渝一面宏開葛藤

永斯開奸謀而安反側明刑政而襄治平端在是矣若
夫加銜加廕濫被恩施殿功邊功尚需嚴核寔可恨者
先帝當彌留之日多官邀橫拜之恩其天啓七年八月
二十一日大工謝恩併寧錦敘捷鹵簿告成三藩之國
所有敘勞秩廕悉宜聽部削除尚寬矯旨之推求用廣
原情之德意併用附及以俟 宸裁所有前項款分名
姓及應得罪名開具于後統惟鑒奪 敕下遵行為此
具本謹具奏 聞

一首逆

魏忠賢

兇殘禍國僭肆倖尊罪惡貫盈神人共
憤逆形已著寸磔允宜

客氏

乳保恃恩兇渠朋結凌尊竊勢納賄盜
珍陰逆首奸死不盡罪

以上依謀大逆律不分首從皆凌遲處死已
經正法

一首逆同謀

崔呈秀

負國忘親通內竊柄兇謀立贊黨禍首
開佐逆罪魁屍猶幸

李永貞

主謀代筆盜帑淫刑佐逆興謀上刑正
法

李朝欽

附奸久與逆謀殉縊未盡其罪
濟惡首孽偽冒三封盜帑竊權罪浮于

魏良卿

辟

侯國興

妖種盜庫同謀逆孽駢誅允當
刀筆深文兩奸害眾辟刑次等具載爰

劉若愚

書

以上依謀大逆但共謀者不分首從皆凌遲
處死律減等擬斬

一交結近侍

劉志選

諂附擁戴
傾搖母后驅逐戚臣罵母之律尚寬通
內之誅難逭

梁夢環

諂附擁戴

與劉志之併力合謀情罪維均律法宜正

倪文煥

諂附擁戴

拜逆為父嫉忠若讐奸黨無辭上刑非枉

田吉

諂附擁戴

璫姻內轉躡加尚書竊勢鬻官擬辟允協

劉詔

諂附擁戴

媚首兇疊建生祠叅道臣幾至死地迹昭附逆罪蔽冠軍

孫如冽

諂附擁戴

京祠首建諛頌不倫朋奸騙贓辟刑允當

許志吉

諂附擁戴

矯旨派贓附逆流毒黃山一案重辟何辭

薛貞

諂附擁戴

執法無聞媚奸有跡劉鐸一案已足抵償

曹欽程

諂附擁戴

媚逆竊權張威納賄報復代叅正類削

奪竟致殞生佐使殺人情法允協

吳濂夫 諂附擁戴

媚奸遷秩附逆建祠推債帥分賄酬恩
縱姻弁喪師貽患九遷稔惡一辟明刑

李誦龍 諂附擁戴

蚤緣線索起據銓衡附奸伐異黨同媚
逆望風承旨幾釀清流之禍何辭兩觀
之誅

陸萬齡 諂附擁戴

倡祠國學侮聖媚奸名教罪魁極刑莫
貸

李承祚 諂附擁戴

勳爵黨奸稱頌無等兩公再請三尺難
容

田爾耕 諂附擁戴

侍衛近臣爾比者逆冤斃多命死有餘
辜

許顯純 諂附擁戴

詔獄酷刑逆奸授意冤斃忠諫宜正辟
刑

崔應元 諂附擁戴

北司貼刑迎合逆璫索賍戕命擬辟無

苛

張體乾

諂附擁戴

獻諛邏人駢殺五命劉鐸冤對大辟宜償

孫雲雀

諂附擁戴

理刑阿逆驟列官銜冤命宜償大辟非枉

楊寰

諂附擁戴

用刑酷烈殺害多人應正典刑戍死為幸

以上依諸衙門官吏與內官互相交結世漏

事情夤緣作弊而符全奏啟者律斬秋後處決

一交結近侍次等

魏廣微

首開諂附陰行贊導

失儀忿劾因合內謀小票潛通中借矯旨害心因而禍國委柄至于不收

徐大化

傾心擁戴陰行贊導

陰拱元兇顯為戎首魏廣微始禍原與密謀楊漣等恡冤更多主使

霍維華

諂附擁戴

主持三案羅織多人覆魏忠賢敘功疏

云茅土尚覺其輕覆魏良卿加九級至
太師尚餘一級助逆顯著閃爍何為
張訥 諂附黃道

首叅趙南星成死善類株連即推兄張
樸巡撫用示酬報桐封迫遣似黃陰謀
閻鳴泰 頌美

畿輔三鎮請建七祠即云會題何不少
避形迹人心依歸天心向順輒形章奏
豈得盡委呈詳

周應秋

頌美

稱頌三十九本題請公侯伯誥改武廕

為文廕借推人以處人逆孽封公本有
一徹臣心存浴日志切補天宜進尚公之
典永堅帶礪之盟等語

李魯生

諂附黃道

倡執中宅中之說為二魏解嘲凡殺人
媚人之凶皆一言流毒至攻周起元一
着尤勝頌首惡十本

楊維垣

擁戴黃道

王紀叅客魏徐大化出疏擠排大化殺
周朝瑞頌大章喉使代劾至叅崔奸疏
中猶為魏逆稱頌欲更別局無示酬恩

潘汝楨 首開諂附

交結織監潛通內廷首建逆祠尤為始禍俯順輿情本有廠臣心勤國恤念切民隱等語

郭欽 諂附

首逆姻親躡推戎帥夤緣不避罪累何辭

李之才 頌羨

建祠孝陵前主使有人代奏宜罪

以上依交結近侍官負引名例律減等充軍仍敕下法司行各該撫按官招擬具奏

有賍私情節一併看明奏請候部覆發落

一逆孽軍犯

魏志德 魏良棟 魏鵬翼 魏撫民

魏希孔 魏希舜 魏希堯 魏希孟

魏鵬程 傅應星 楊六奇 容光先

徐應元 劉應坤 王朝輔 徐文輔

孫進 王國泰 石元雅 趙秉彝

高欽 王朝用 葛九思 司雲禮

陶文 紀用 李應江 胡明佐

一交結近侍又次等

馮銓 諂附贊導

父雖向與內通到閣因而協贊門生密友代嗾噬人要典主持尤為罪案傳聞揭救周宗建等又分遣中使時曾有阻止積愆莫贖末減可需

顧秉謙

諂附

天啟四年十二月至六年九月主票中間止遣內鎮微有規陳乃刑賞僭濫一無匡正褒論輕褻阿逆何辭 聖明有頑鈍依阿有負 先帝付托之旨允是

定評

張瑞圖

頌美

逆祠坊額碑文人言多其繕寫已達天聽豈是風聞

來宗道

頌美

為崔呈秀請卹有在天之靈語雖由司呈何無駁正仰聆 聖諭鑒察凜然

郭允厚

頌美

題覆稱頌四十疏請逆封莊田祿米六本頌有達聰明目居高聽卑及安即安社稷之安平非平一方之平等語

薛鳳翔

諂附頌美

題覆稱頌四十七本請給逆封第宅鐵

券四疏首頌厥臣偉績本有勞著大工
勲高社稷既錫通侯之爵允膺第宅之
封等語

李蕃 建祠贊導

師友剛比合謀叅劾多其代艸望門投
拜人傳為四姓奴建祠諛稱至呼為九
千歲

孫杰 贊導

首劾劉一燝再劾周嘉謨給事召還尚
書躡級剪忌已見楊漣疏內附璫遂與
崔逆齊名

張我續 諂附頌美

軍餉中旨開銷蠶絲薦起戶侍助工踰
萬餽內有徵頌本有心膂重臣公忠謀
國嫉邪扶正世宙清明等語罪有定評
餉宜嚴勘

朱童蒙 諂附頌美

建祠佐逆母死奪情頌本有厥臣赤心
報君訐謨定國俎豆兼軍旅之學墨練
治征討之任等語

楊夢袞 諂附

給事三年宮保八座管工結納不避嫌

疑大工侵牟見于勅奏

李春茂

頌美

宣武門建茂勲祠給助庫銀三千兩祠成傳帖慶賀叩拜建祠本有至德莫可名言下情惟有祝釐等語

李春燁

頌美

例轉給事躡陞尚書辭恩本有皇極鼎建內則嚴臣監臣竭力抒忠外則閣臣工臣宣念分猷等語又先為移宮事疏救罪璫為終始通內之證

王紹徽

頌美贊道

造點將錄佐中旨處分劾馮後吾致抑

鬱憤死

徐兆魁

贊道

惠世揚碩大章誣案其在刑部時所成詛咒一招璫名併列

劉廷元

贊道

挺擊一案黨禍開先叅張差誤主風癩王之寀竟以慘死

謝啓光

贊道

纂修要典動稱中旨恐嚇詞林稍有異同徑自塗改斥南厚餽璫奸緝獲弥縫

開住

徐紹吉

贊道

竄身史局纂修要典斥廢慘殺諸臣各欲留一罪案叱呵詞臣塗更原稿

邵輔忠

頌美贊道

府丞驟躡尚書攻擊多其指使送藩封本有云監體悉厥臣節制俾臣得行其事等語

楊所修

頌美贊道

吏都不駁封爵轉南徼及奪情三事文案一疏又為要典張本頌本有厥臣身

賈繼春

贊道

事視君家事視國等語

保護選侍藉獲難端四罪一疏得罪公論出處占望反覆無恒

范濟世

頌美

頌疏自敘一歲五遷搜括助工錢糧數十萬捐貲助餉本有勞在封疆慶貽宗社等語

李養德

頌美

郎署加銜尚書奪情忍同敗類頌本有禁地元忠密勿贊襄主持在內等語

阮大鍼

頌美贊道

曰楊漣有叩馬獻策之語報復有魏大中楊左之叅至合美七年一疏尤為璫逆巧護解嘲

姚宗文

頌美

湖廣建隆仁祠頌本有東廠魏上公間出名世以澄清世道為任翺戴聖明為心等語

陳九疇

贊道

借謝應祥一事傾述南星高攀龍等受嗾得報乙榜亞卿

元詩教

贊道

諫垣專政璫諭起官主盟俄而建牙失職依然耽視

趙興邦

贊道

兵垣賄聞失職吏都營起復讐趙太宰力致譴贓五御史一疏駢斥

傅魁

贊道

結同宗潛通內廷持異見顯開始禍

安伸

頌美

按差已滿田金助祠頌本有天眷聖明賚心膂以贊內外臣衙門已有公疏不

能自陳芹曝之忱等語

孫國楨

頌美

撫登稱頌二疏有聖主中興明良會合
一厥臣忠誠貫天地勇略震華夏等語又
一厥臣擎天巨手翼運真才并有一腔忠
義四應才鋒等語

郭鞏

贊導

為魏忠賢報首叅之仇致周宗建有逮
死之慘亞卿躡轉通內可知

馮嘉會

頌美

部務請囑多徇稱頌十有六疏覆劉應

坤本有厥臣精忠體國矢志籌邊既荷
特達之知必蒙破格之眷等語

曹思誠

頌美

河間釀金建祠要津摧折善類辭恩本
有赤心報國殫力圖度費省功倍之親

臣云

孟紹虞

頌美

署禮部九天輪奐一新本有心膂元老
篤生應運等語

張樸

頌美

建四祠頌十二本有皇天開億萬載靈

李恒茂

贊道

長之祚上公特應五百年名世之期又
天啟明良又內鎮清忠元臣指授等語
薦起崔呈秀等為三李中一人入幕叅
謀爾比害正

郭尚友

頌美贊道

畿撫報南星恨控漕建瞻德祠神功叅
天地本有厥臣掃逆如雷如霆翼正為
雨為露弘德無涯大功無並等語

李精白

頌美

東省三祠諛頌六疏元輔功高普被本

有厥臣孤貞報主殫力匡時挈魁柄以
還至尊掃浮雲而開九照傳聞頌聯有
至聖至神多福多壽等語

秦士文

諛附頌美

祠頌七疏餽器鏤名頌本有業赫聖明
之世昭上公之功等語葛九思薦士文
忠誠天授敏捷颺飛

張文熙

頌美贊道

逆黨姻親羣邪契好啖倪文煥誣周順
昌巡視光祿有頌璫疏

楊惟和

贊道

主事加銜副都暱奸曲盡諂媚

何廷樞

頌美

封爵已定給賜宜優本有查撥額地七
百頃銀二千兩及查叅違例逋欠等語

陳朝輔

頌美

安平莊田催撥各屬先報田數那解錢
糧

許宗禮

贊導

戶都吏垣更調管察考選曲徇要路躋
陞同鄉比黨

卓邁

頌美

二祠一頌璫敗反攻代崔呈秀報讐叅
夏之令逮死廟筭制勝本有啟臣知人
善任樽俎折衝等語

盧承欽

頌美

諛頌二疏又請刺黨籍榜示海內建祠
本有朕肱良弼社稷元勳扶聖主于中
興煥宸居于大壯等語

陳爾翼

頌美

頌逆有內外諸臣心啟臣之心等語薦
崔呈秀為本兵請五城邏東林餘孽

石三畏

贊導

王官黃緣考選噬劫生死遭誣

郭興治 贊道

攻道學例轉因中旨復還叅方震孺逮
問薦吳淳夫京堂

劉 徽 頌美贊道

稱頌十一本誣房可壯樊尚燥益駐叅
熊廷弼懸贖百萬頌本有廠臣幹國精
忠盡心籌畫三戰三捷奏此敷功等語

智 鋌 頌美

通內得選北道嗾傷善類多人叅解學
龍戾恪削奪頌本有運籌帷幄付托得

人等語

何宗聖 頌美

房山建顯德祠，成買香火地題祠本
有廠臣睿美叅微精誠格天等語

王 珙 頌美贊道

叅方大任問徒追贓祠頌臨中不名廠
臣謝恩本有廠臣志慮精勤經營得法
俾三朝之闕典克行等語

汪若極 頌美

阿逆璫兩疏諛頌羅王贊化一獄媚奸
天心助順頌美本有廠臣緝奸助餉中

外感激精忠等語

陳維新

頌美

叅王允成薦張我續疏云無奸不照又云清明再闢

門克新

贊導

羅織孫文多顧同寅冤斬詞連文震孟陳仁錫鄭鄞除名

游鳳翔

贊導

假叅高攀龍自辨復原職借糾宮秉忠連劾惠世揚

田景新

贊導

始在師門竊柄用事殿工疏薦崔呈秀侍郎兼右僉都御史

呂純如

頌美

惠藩監隨掠斃夫役復命疏薦歸美殿臣

吳殿邦

贊導

媚璫劾樊王家追賍通叅改尚寶卿破例

黃運泰

頌美

建祠守祠稱頌十本有殿臣志切恢復知人善任運籌帷幄文武承受方略等

語

李從心 頌美

祠頌五疏河道敘勞本頌有啟臣本擎天捧日之赤心運旋乾轉坤之妙用獨居首功當膺特典等語

楊邦憲 頌美

江西建祠元勳功德甚隆本有啟臣魏上公光岳元精扶輿正氣等語

郭增光 頌美

河南會建戴德祠有啟臣德隆乞請額名本有體國精誠感民傾慕等語

單明詡 諂附

主事三年躡躋巡撫肅寧城工得力哉輔籌邊未聞

王 點 頌美

巡撫大同會建嘉猷祠助工本有啟臣純忠為國默助自天邊疆未吏敢不體啟臣以體宸衷等語

李 嵩 頌美

登萊二祠稱頌七疏有啟臣神謀秘美授計籌邊赫聲濯靈揚威各鎮等語

牟志夔 頌美

建祠派銀屬負稍遲立斃解役

張三傑

頌美

巡撫甘鎮稱頌五本有厥臣與閣部和衷籌畫遠燭邊陲紀綱振肅等語臬司驟躋開府畜緣攀附有徵

曹爾禎

頌美

撫晉建祠三本有心膂重臣早夜經營細大拮据等語

毛一鷺

頌美

蘇州同王珙建祠被逮周順昌激變

張文郁

諂附

周維持

主事驟躡侍郎替工畜緣媚逆

賁道
疏請刻黨籍拆書院論劉一燝周嘉謨等削籍

徐復陽

賁道

証郝土膏追贓叅方逢年等削奪持局結案二疏護奸害正有徵

黃憲卿

頌美

中城山東二祠二頌元勳萬古為烈本有厥臣赤心中天日月熱腸特地乾坤成兩朝大慈大孝佐九重允文允武等

語

許其孝

頌美

揚州會建瞻恩祠頌本有督厥魏上公
天付英姿靈鍾名世功高社稷德被商
民等語

張素養

頌美

薦邪被劾復官巡方二祠一頌王師屢
捷本有賴厥臣以安社稷之心定制勝
之畫方略密授機宜悉符等語

王裕

頌美

建祠守祠諛頌七疏元臣功德天崇本

有魏忠賢丹洞浴日靈腕補天德耀乾
坤勲在社稷等語

梁克順

贊導

受人意指橫肆劾彈蒙恩本有東林元
兇大慙立為逮詰削奪海宇共覩清醒
等語

劉弘光

頌美

兩院會稿建報功祠屢疏抨彈多屬善
類

溫阜謨

頌美

湖廣建隆仁祠本有厥臣翼贊朝廷計

安社稷懋德崇功藏在盟府等語

鮑奇謨 頌美

河南會建戴德祠頌與郭增光同

陳以瑞 諂附

叩逆像長揖佛前致瑞疑旋被斥逐

莊謙 頌美

會建祝恩祠併頌二本有廠臣德著廟堂中外享有道之福內扶社稷遐迩承

無疆之休等語

熊萃肅 頌美

鹽差建祠本有東廠魏上公顯然柱國

李應薦 頌美

元勳卓尔清朝碩輔等語

薦潘汝楨監試中崔鐸招嫌

何可及 頌美

頌疏五本 先帝逆璫並稱

李時馨 頌美

改折本內有火災修省天心仁愛內有竭忠之臣外有調元之相何難消弭此真堯有九年之水益成其為聖帝等語

劉漢 頌美

而疏媚逆科叅可憑

王大年

頌美

巡城建祠雖由合疏中臺執法憲紀何存

余合中

頌美

恭陳聞見本有臣跼伏田里臺臣崔呈秀等交章薦拔又潔已急公之厥臣保護于內鳳至麟生等語

徐吉

頌美

建祠本有厥臣澤被海隅等語祠成仍疏敘効勞官有厥臣功德不朽等語

宋禎漢

頌美

張汝懋

贊導

淮南建瞻德祠會疏同詞諛頌

証叅樊尚燦房可壯楊嘉祚追駐

許可徵

頌美

兵垣以邊事頌加銜至左副都捷音俘解本有厥臣先機運籌閣部沈心謀贊內鎮督撫道將鷹揚闔外等語

劉述祖

頌美

撫院會稿建祠諛頌無所規正

李燦然

頌美

河東會建褒勲祠本有魏上公帝簡篤

生佐興聞出允九五之元臣詢五百之名世等語

劉之待

頌美

會潘汝禎疏到稍遲後以例推被削

孫之獬

贊導

中崔鐸嘖有人言哭要典大貽嗤笑

吳孔嘉

贊導

登第即工通內黃山慘殺多人

季寓庸

贊導

奸黨薦入銓司鑽營見于叅劾

潘士聞

頌美

閩中試錄序文有聖主當陽帝賚良弼策問有廟堂之上帷幄之中勝美密謀出奇捷略等語

王應泰

贊導

試錄列內監督撫前序文有心膂股肱等語

張元芳

贊導

逆樞至戚薦入銓司

阮鼎鉉

頌美

証叅呂坤併鄭三俊三案元兇一疏頌璫脩極稱揚

李若琳

頌美

上林官民建祠列名不能堅拒

張永祚

頌美

建良牧署存仁祠嘉蔭署洽恩祠林衡

署永慶祠

周良材

贊導

璫孽逆封案呈題覆

曾國禎

頌美

建蘆海橋隆恩祠本有廠臣精神格天

睿美通微等語

張化愚

頌美

建崇文門廣仁祠元功德業普施本有
精忠貫日等語

李桂芳

頌美

大工諛頌又守令怠緩本叅賀仲軾胡
敬辰有廠臣急工之念可容草莽委之
等語

張一經

頌美

軍國大計本有天眷聖明篤生廠臣安
內 功高千古等語

陳 殷

贊導

主事僕卿奪情視事

夏敬承

頌美

拜祠首倡諛言上公高懸榜諭

周宇

諂附

附胡監鄉親厚善誇魏祖神道通靈

魏豸

諂附

自認義孫逆祠朔望謁拜

郭希禹

頌美

輸田二百頃為生祠祭田

頡鵬

頌美

逆祠倡拜題額陞郡稱建專祠

李際明

諂附

魏和政

諂附

劣轉賄奸陞官逆祠治品供獻

岳駿聲

贊導

借胡監分金薦揚而拜逆祠繞門引水

誣王之寀受賍竟至逮死梃擊誣案已燬肆辨不休

郭士望

贊導

直陳東林陷害本有厥臣魏上公轉陰霾日月為光明乾坤臣何幸遭逢明良盛世等語叅南居益魏大中等又自稱曾經崔呈秀特薦

張聚垣

諂附

准貢附璫璫轉管差貪累萬金

周鏘

頌美

河南督修戴德祠毀王府民房二千餘
間起宮殿九楹

徐四岳

頌美

任子工部加銜卿貳頌本有臣蒞任以
來木稅一節倍意釐剔一念微衷莫非
仰體廠臣德意等語

辛思齊

頌美

諛頌二本憑璫攘官

胡芳桂

諂附

憑恃與援復讐害正

以上依交結近侍官負律引名例律減二等
坐徒三年納贖為民

一諂附擁戴

李實

李希哲

胡良輔

崔文昇

李明道

劉敬

徐進

馮玉

楊朝

胡賓

孟進寶

劉鎮

王體乾

梁棟

張守成

商承德

以上一款十六人並前一款徐應元等十六
人中有見任閒住的并放回原籍的都着革

去冠帶為民當差奉 聖旨覽御等奏這逆
謀黨附諸人罪狀各殊刑章宜正除重辟正
法監候逮問見擬外其充戍招遣及贖徒為
民行談撫按照款結止具奏朕遵明國憲勅
法除奸申儆官刑昭布中外還同敕諭一併
通行該部院知道欽此

大學士韓

等奏為遵奉

聖諭事臣等欽承

皇上

屢諭叅定附逆一案反覆商酌除將頌羨賁導諸臣分
別重罪擬戍以至削籍為民開列款項具疏奏聞及
聖諭事本為公而勢非不得已素有才力而隨人點綴如
封疆遺黔及素任無過諸臣俱置弗議處外若稱頌內

稍次前款諸臣或居位鮮進維之略而指縱亦無奸謀
或濫等備疇采之負而線索初非自主或徑本岐邪播
璫惡非為戎首或階曰驟躡稽職掌尚未全隳以逮專
開建牙品原庸碌散僚冗吏識昧挺特者臣等欲再擬
減等則恐前重而後輕非 聖明畫一彰法之意欲槩
擬削籍又慮罪輕而法重乖治朝酌量宥過之仁謹依
考功法不謹例一款將諸臣並擬間住另請 上裁如
蒙 皇上俯允彼重處者知媚逆之不可為即寬政尚
後褫削此量懲者幸身名之未盡辱縱稿項亦荷恩波
其于振揚人心培養元氣未必不均有藉矣至內中軍
民商匠數本臣等初擬行撫按查究既復思之此輩么

廢末品見縉紳尚且風靡彼效尤何足深怪又聞上本
時多奸棍捏名希榮竊潤今名雖在而人半非必行追
究恐有桃僵李代之虞其真正倡謀罔利者地方官執
而治之有餘可無重煩宸斲為也再照此舉臣等凜
奉聖謨臚分二案考據不敢不覈程量不敢不平秉
心不敢不虛持議不敢不正年來目覩耳聞收拾略盡
即更有溢出或存疑者決無元惡大憝得竄逃于指示
之外聖諭謂終有漏遺亦赦而不究大哉王言真與
覆載同量從此靜戢玄黃各修職業養世道平康之福
慰聖明宵旰之憂臣等願與大小諸臣共勉之矣臣
等不勝激切昧冒之至為此謹具奏聞

計開

黃立極

代言秉軸碌々狗人出鎮璫封唯々聽命

施鳳來

票擬不聞力諍趨諾亦未當先

楊景辰

掌院曾有頌疏入直未聞顯過

房壯麗

涇渭漫無主裁線索隨人指授

董可威

在工一味恭謹幸猶見機去早

李思誠

王家棟居間一事雖賄非自受然昵比

匪人遭璫削奪頌璫有純忠體國大業
匡時等語

王之臣

操守多議亦有頌疏年來涉歷邊疆稍

寬一點

胡廷宴 才本庸憤濫等逮牙致盜賊充斥人謂
黃緣貽禍

張九德 素無節鉞之望乘時倖躡謙非無因

馮三元 躡躡副院人望不孚

喬應甲 撫奏滋議追贓候結

楊維新 繩助之國二疏稱頌

朱國盛 輓漕二載勞議相半加銜躡躡速化何

辭

馮時行 逆璫同里以破甑營改京堂

呂鵬雲 年例告病與孫杰等破例復官未幾乞

差猶能自遠

董懋中 察處借題辨復改陞京堂

周昌晉 持議每多依傍循資未見躡躡

虞廷陞 叅趙南星等薦李夔龍等不協公論寂

後遭璫削奪差能晚蓋

楊春茂 素無大過二疏涉頌

徐景濂 昏贖潦倒持論舛僻

陳保泰 例轉中旨復官璫敗曲疏文飾

郭興言 浮沈依附亦有頌疏後叅郭守仁等一

疏可原

周維京 為南京兆嘖，人言兼有頌疏

徐揚先 顧大章惠世揚獄依違文致薦譽亦多
匪人後遭璫削情稍可原

陳序 誣孫居相叅梅之煥聽人指使

曹谷 以報藩舟出境頌又疏論要典不可燬

朱慎荃 頌止一疏揄揚太甚

郭如闇 生平操守無疵寧錦賀捷頌羨已過

何早 兩疏稱頌趨向不端後為李明道論劾

姑從寬議

虞大復 揮霍有餘操持多議至稱頌形之辨揭

葉天陞 遊玩逆祠遂致屈膝雖傳汗顏何追愧

心

邱存性 外計不謹起補原官旋躡兵曹人多異

議

葛大同 與胡良輔交好旗幟鼓吹迎送江干

歐陽充材 始因任性觸璫後以弥縫毀節

夏之鼎 兩任縣官原無善蹟製扁送祠有干清

議

張九賢 外察不謹自疏復官

李宜培 在銓滋議亦有頌疏

譚謙益 堂官叅處自辨復官

吳士雋 疏頌

徐溶 疏頌

潘舜歷 疏頌

李三楚 疏頌

董舜臣 疏頌

陳守瓚 疏頌

以上俱照考察不謹例擬官帶閑住奉 旨
這次款所列量懲各官擬議允協都着照不
謹例閒住諛部知道

附逆案漏網

張 樞 道

疏請赦卜有少年學士英妙亦未可少
之語專為馮銓推轂又叅陳伯友蕭毅

中削奪

趙胤昌 道

擁戴涿州特叅貴池又叅李瑾劉懋中
削奪

袁 鯨 道

朋謀推戴崔呈秀疏請赦卜與劉徽同
又疏叅王紹徽韓策江先岸削奪

王業浩 道

同劉徽袁鯨朋謀推轂崔呈秀赦卜又
叅馬孟禎韓萬象方有度削奪

張惟一 科

已有旨降謫崔呈秀特疏留用遂叅武之望萬邦孚等又希附呈秀意陷害侯恂侯恪

薛國觀 科

疏叅蕭近高喬允升開任由上任逮問熊明遇革職聽勘劉永基削奪

葉有聲 科

疏薦阮大鍼又叅劾馬調律翟學程削奪

李應公 道

疏叅王洽為民例轉孫杰李嵩

陳容謨 道

疏叅劉廷諫孫必顯韋蕃削奪

曾應瑞 道

疏叅范鳳翼姜習孔孫紹統削奪岳元聲田籍聽勘

黃承昊 科

疏叅南居益削奪荆養喬惠承芳間住承芳世揚父

楊維岳 科

疏叅段然削奪又叅喬允升蕭雲舉

蘇兆先 科

疏叅周希聖蔣允儀趙廷慶削奪

王時英 道

疏叅庚暉程註樊王家劉可法胡世賞
削奪

丘兆麟 道

疏叅趙秉忠劉芳削奪

王際達 道

疏叅畢懋芳李騰芳削奪

陳世竣 道

疏叅郝名宦羅汝先削奪

蔡國用 道

疏叅趙興邦曲詆葉向高孫承宗趙南
星等

邢紹德 道

疏叅韓策江先岸削奪

李光春 道

疏叅葉向高備極詆毀

呂下問 部

黃山一案同許志言激成徽州民變

以上二十一人俱應補入黃道從重擬罪

田一甲 道

疏辨孫瑋祭一榛李樸胡忻等因得罪

門戶以致外轉有旨俱着陸京堂用
朱之俊 任司業署監事榜示通衢有魏上公之

功在禹之下孟子之上等語

徐時泰 與孫之獬僅四年簡編躡陞侍講主試

順天中崔逆子崔鐸

陳其薦 與張士範亦由簡編躡陞侍講主試應

天中應秋子周錄

張士範 應天鄉試題出見而民莫不敬五句以

至聖頌逆奄侮聖極矣

陳盟 浙江試題出魏乎三句文王以民力

四句既頌逆賢以堯又頌違祠以靈臺

靈沼諂諛極矣

曾楚卿 纂修三朝要典

姜逢元 同前

余煌 同前

朱繼祚 同前

華琪芳 同前

張紳 同前

楊世芳 同前

吳士元 同前

李光祚 侯

擒武長春案頌美逆賢加封魏良卿肅

寧侯

李起元 同前

王永光 本兵

同前

張惟賢 公

寧遠奏捷頌美逆賢請加封魏良卿等
公侯伯爵

王在晉 尚書

同前

林宗載 科

同前

吳弘業 科

同前

段國璋 侯

同前

常胤緒 侯

三殿工成頌美逆賢功勛

李覺斯 三殿工成頌美逆賢功勛

莊起元 以遼船順風頌美逆賢

李國樞 以殿工辭恩頌美逆賢

蘇茂相 同前

湯國祚 侯

捐貲助祠祝頌有詞

李守錡 伯

同前

袁 燹 乙丑進士丙寅躡陸少卿非附璫黨何

由速化

以上三十人俱應補入諂附定罪

史永安

張鳳翼

梁應澤

袁崇煥

李誠銘

梁世勛

以上六人亦俱建祠但與諸奸宜減等論

史逆案者輔臣韓爌李標錢龍錫周道登冢臣王永光
憲臣曹于汴也當大慙斬除之後自應窮治其黨上呂
副聖天子錯枉之權下以昭千萬世人臣之戒春秋之
義首嚴亂臣賊子而必先治亂臣賊子之黨法至嚴也
王永光業已本兵頌美矣以頌璫之人為定附璫之案
謬執甚焉且也楊世芳為蒲州公也戚薛國觀為沈惟
炳也友俱邀恩一面之網于是同事者皆援例而逃吏
議操法紀以佐聖天子者固若是耶即就案中論之亦
寔多可商者人臣非有大功不許封公侯此祖制也所

司朦朧奏請當該官吏及受封之人皆斬律也今逆孽
魏良卿斬矣而奏請三封之周應秋何以不辟交結內
官近侍人負者斬謀殺人造意者斬律也而顯行通內
之霍維華孫杰馮銓邵輔忠羅織熊案之徐大化楊維
垣何以未減也又律上言大臣德政者斬何況闡寺而
首建生祠之潘汝禎何以倖免也又律子孫罵父母者
絞此就愚氓言也劉志選梁夢環甘作鷹犬直攻懿安
忍下華歆之毒手顯行成濟之操戈懷奸如此駢斬何
歟而僅擬一絞何以平人心也三朝要典明為逆賢權
書矣而纂修之曾楚卿宋繼祚等何以竟格外也捐助
之杜藩勛臣建祠之梁世勛李誠銘郭振明捐貲之李

守錡湯國祚頌美之張惟賢常胤緒獨不可奏請處分
乎黃立極等身入綸扉而滿朝頌德遍地生祠不聞諍
心焉用彼相顧乘謙位居首輔而播惡成禍皆出其手
區區贖徒遂足蔽其辜乎至間住一款為居官不職者
沒耳諸人既屬逆賢私黨豈容復廁衣冠之末而猶以
不職之例列之乎艸莽放論竊謂劉志選梁夢環應照
崔呈秀決不待時妻孥沒入家產籍官其通內顯著孫
杰等熊案主謀徐大化等與首開禍始之顧乘謙請題
三封之周應秋首建生祠之潘汝禎應照吳淳夫等監
候處決其僭諛在天之來宗道叩首九千歲之黃運泰
堯天帝德之李精白戾爭要典之孫之獬與原擬充軍

之間鳴泰等俱應改發邊外為民做古投諸四夷以禦
魑魅之義其原擬贖徒張我績郭尚友等應改充軍王
點上梁不出猶知羞惡應仍入為民一項其黃道漏網
張樞表鯨等纂修要典曾楚卿朱維祚等試題頌美張
士乾陳盟等建祠頌美史永安張鳳翼梁應澤等頌美
漏網王永光蘇茂相等申詳生祠司道張維世甯三翰
等與原擬閑住黃立極房壯鹿等俱應改為民其楚藩
與劾臣郭振明等應題請停爵革祿用是示懲表崇煥
爾時雖云邊功亦應題明請旨定奪內呂鵬雲雖中旨
京堂而即乞差自遠姜逢元閣筆一歎隨遭斥逐二人
應與開釋許其自新蔡善繼梁廷棟王堯民曾櫻石萬
平矣

程應加優擢為守正不屈者勸夫如是庶乎得刑罰之
平矣